

重修兩淮鹽法志

兩淮鹽法志卷六十八

轉運門

疏濬

四

光緒十三年九月兩江總督曾國荃會同漕運總督盧士杰署兩江總督湖廣總督裕祿江蘇巡撫崧駿奏八月十四日河南鄭州地方黃河漫溢水悉入淮臣盧士杰於十九日接到東河督臣成孚河南撫臣倪文蔚電音當卽轉電各處並派弁分探水勢臣裕祿派候補道黃祖絡吳修敷查看各工相機布置又飭淮揚道廳將湖河各工擇要加築臣崧駿一聞此信卽飭司道派員查

兩淮鹽運使司文卷之十一
明水勢籌備撫卹災黎臣國荃二十二日由金陵起程
二十四日抵揚州接大學士直隸督臣李鴻章電稱欽
奉

寄諭敕令從緩北上因卽查看各工於二十七日到清江浦
適臣士杰接到東河督臣咨送奏稿內稱鄭州漫口漸
次奪溜正河下游斷流口門刷寬三百餘丈深一丈七
尺等語因在浦連日面商此次黃河漫口全溜旣已入
淮一旦湍流驟至悉注於洪澤湖旣非黃河之故道又
無歸海之正途其患何堪設想查洪澤湖爲淮水尾閔
而淮揚兩府又洪澤湖之下游也每年淮水長發湖隄

喫重淮揚已岌岌可危今以湍悍之黃河匯淮東下其危險更百倍於尋常黃水入淮所行皆淮之舊路卽當以防淮之法防之見在臨河壩埽槽土子堰及裏運河束清等壩經臣士杰飭該管道廳趕緊修築其高寶一帶情形尤重該處東西兩隄雖已擇要修整惟平時可緩之工今已變爲至急亦經札飭隄工局司道加意增培以防泛濫此修守舊工之大概情形也查治水不外宣防二策而宣之爲用尤多洪湖出路本有二處一由束清壩而達清江一由禮字河而趨高寶諸湖然皆由運河以入江儻或宣洩不及則啟高郵各壩由下河透

逃入海惟是入江既患預託入海又苦港窄今者大患
將至不能不於湖之上游多籌出路二條分枝宣洩庶
幾下游之患稍輕數千萬生靈之身家性命尙可保全
據徐州道段詰博採羣議稱桃源縣有成子河一道南
接洪湖北至舊黃河又北爲空地又北爲中運河若就
成子河大加挑挖通於舊黃河再於空地接挑河身使
之直達中運河兩岸各築一隄即可引所漫之水由楊
莊舊黃河至雲梯關入海此洪湖上面新闢一去路也
臣等見已議定卽派段詰辦理一面勘估一面興工爲
分洩大溜之計又據署淮揚海道劉鍾靈廣集眾議稱

清河縣境內有碎石河一道西接湖濱之張福口引河東達舊黃河同治七年前漕臣張之萬曾經挑濬以分湖水若將碎石河大加挑挖亦可引所漫之水出楊莊舊黃河至雲梯關入海此洪湖下面新闢一去路也臣等見亦議定卽派劉鍾靈徐文達辦理一面勘估一面興工爲拯救目前之策一俟兩河挑有頭緒卽須堵閉順清河使湖水不致闖入運河以順其東出楊莊之勢臣等非不知舊黃河底高於湖面挑挖甚難工費甚鉅中運河來源太多修守喫重祇以求減黃淮合流之盛漲以保裏下河數千萬之民生不得不竭盡人謀力圖

興辦臣裕祿所派之黃祖絡吳修數與段喆劉鍾靈徐文達均係河工老手實心任事數日之內詳考形勢測量高下詢之老於河務之士紳耆舊僉謂舍此別無良法臣等是以定議但使人力可施卽行毅然興辦此別籌分洩黃淮合流去路之大概情形也至於修守舊工費已甚鉅而別籌分洩用款更多祇以事機至迫淮南北千餘里民間之性命室家所關太大正宜趁此九月十一三箇月內晝夜趕辦速引宣洩之路不及拘泥成規往返周折遷延時日致誤事機臣等一面會奏一面在於江蘇司局各庫無論何款提撥銀二十萬兩並在

於江甯司局各庫無論何款提撥銀十五萬兩以應修
隄挖河之急至於勘估要工繪圖貼說籌備經費以竟
河工設法撫卹安置災黎勸導官紳商民殷實之戶捐
助河工賑款容臣等隨時奏明次第辦理奉

硃批覽奏均悉所籌修守舊工及分洩情形尙屬周妥卽著
督飭各員認真辦理以衛民生欽此是月戶部尙書翁同
龢工部尙書潘祖蔭奏本年八月鄭州上南廳決口三

百餘丈全河斷流

詔詞嚴切責令河臣督率工員設法搶辦數日以來外間議
論或謂乘此可復故道幾疑決口不必遽塞臣等愚見

以爲見在水勢斷不能入黃河故道也山東之患仍未
能弭也潁壽泗徐淮揚一帶患且不可測也請一一陳
之伏考黃河自大禹以後行北地者三千六百一十餘
年其南行者不過五百一十九年是黃河由雲梯關入
海本不可謂之故道也即使指爲故道而見在鄭州決
口由賈魯河入淮直注洪澤湖洪澤湖形如側釜北高
南下斷不能導之使出清口其去故道尚不止百餘里
安能挽既倒之狂瀾循久淤之舊轍乎故曰見在水勢
斷不能復入黃河故道也或者謂山東數被水害遂以
黃河南流爲幸不知河性利於北行自金章宗以後河

雖分流然大德中決蒲口至正中決金隄有明一代決而北者十四次決而南者五次我

朝順治康熙以來決而北者十之九決而南者十之一今之淮水本無經行之渠黃水入淮安有歸宿之地下流不得宣洩上游必將復決決則仍入山東境內齊魯之間安能高枕哉故曰山東之患仍未能弭也至於黃水南注害不可更僕數約略言之有二大患五可慮見在黃入淮渠直注洪澤而清河以下淮口久經淤墊吳城十四堡久不過水僅張福口引河闢不過數丈其大溜由舊禮壩俗名三河之處併而東注以寶應高郵邵伯

諸湖爲陂澤以運河爲尾閭裏下河一帶數百萬生靈
僅恃東岸一綫之隄防護業已岌岌可危今忽加以黃
河則運河東隄必不能保大患一洪澤湖淤墊以後涸
出數千頃柴灘皆已設立湖灘局按畝升科吳城七堡
一帶石工又已折築清河城垣高堰久不可恃黃水勢
悍入湖以後難保淤灘不立時坍卸昔潘季馴兩河議
曰高堰較寶應高一丈八尺較高郵高二丈三尺高寶
隄較興化泰州又高丈許或八九尺後來湖墊益高高
家堰且高於寶應高郵諸水者數倍挾數倍建瓴之勢
以灌千里之平原故俗有決高堰淮揚二府不復見之

謠明隆慶四年高家堰潰全淮東注決寶應之八綫山盤高寶興泰江東諸縣悉爲巨浸命潘季馴治之久而後安然彼時尙祇一淮水也若黃淮併合不東沖裏下河卽南灌揚州是江淮河漢并而爲一矣東南大局何堪設想大患二裏下湖州縣爲產米之區各處辦解漕糧胥取於寶應汎水一帶萬一被水淹沒漕糧從何措辦可慮一卽令漕米如故或因黃河挾沙淤墊運河不能浮送或因積水浸溢緯道無存漕艘停滯且山東本係借黃濟運黃旣遠去沂汶微弱水從何出河運必廢可慮二兩淮鹽場胥在范公隄東運隄一潰范隄亦不

能保鹽場淹沒淮鹽

國課何從徵納可慮三潁壽徐海之地好勇鬪狠夙稱難治小民蕩析離居無所得食難保不滋生事端可慮四黃旣合淮勢不能局於湖瀦必將別開一地自尋入海之路橫流所至朝東暮西江鄉居民莫保旦夕之命可慮五此鄭州決口所以不得不速籌堵塞者也然上游雖塞而見在已經入湖之水亦須早籌宣洩譬如人身既患鼓脹或吐或下必居其一今雖未知水勢所向姑爲遙度之詞假令黃淮合力竟至破高堰入高寶湖湖不能容則運河東西二隄必不能保裏下河數百里內

一片汪洋如入囊中四無出路裏下河地勢東南高仰
導之之術似宜順其就下之勢由興化以北厯朦朧侍
家塢等處入舊河身避過雲梯關以下淤沙橫穿而北
開濬大通口四十餘里入於潮河以達灌河海口如此
則取徑直捷形勢較便經費亦不至過鉅可否

敕下兩江督臣漕臣察看情形妥籌辦理所謂設法補救者
此也嗣經兩江總督曾國荃奏黃溜東注淮南北地處
下游亟宜籌分洩之策先經臣等會奏請挑成子河碎
石河以期引水由雲梯關故道入海旋經測量地勢北
高南下工費亦甚浩繁將來能否收效殊無十分把握

未敢虛擲鉅款見就楊莊以下舊黃河二百餘里一律
挑濬以分沂泗之水騰出中運河預備洪河盛漲挾黃
北行堪以容納是上游已籌有去路而全淮之水由三
河壩直趨而東則運隄極爲喫重勢不能不開壩宣洩
裏下河形如鍋底而枝河頗多若能預先疏導使水能
順軌不致漫溢則田廬民命亦可保全前奉

寄諭鈔發翁同龢潘祖蔭之奏洵得水性就下之勢業經臣
等飭派委員分投履勘而施工之難易行水之暢滯何
處須挑何處可緩必須熟悉河工大員督率經理庶可
獲事半功倍之益合無仰懇

天恩准調江蘇臬司張富年赴工督辦實於大局有裨是月
吏部侍郎徐郵奏黃河爲患自古爲然其所以爲患之
故不外下壅則潰於上上潰則游於下二語查黃河自
咸豐五年銅瓦廟潰決至大清河入海時以軍務方亟
未遑施治而黃流安行轉未至四潰爲患者河流寬廣
餘波得以容裔故也其後民田日增河防日密但知從
事於築隄絕未盡心於挑潛以至隄身收束河怒無所
洩屢屢漫決而上潰則下游海口因之日高此山東之
河所以上勞

宸廑也見今鄭州漫口寬至三百餘丈江皖豫三省悉被其

卷之二十一
八
害蒙

皇太后

皇上屢發鉅帑賑撫災黎並嚴飭河臣迅速堵塞是淮揚實無位置黃河之處具在

聖明洞鑒之中三省災黎莫不感泣臣愚以爲目前籌畫先宜於淮揚籌宣洩之方再於漫口求堵合之法至堵合之後黃河趨海不暢仍有潰決之患則大清河海口不得不議疏通謹就管見分條開列於後一洪澤湖之天然引河張福口引河等處速行開濬並開成子河分洩黃流也洪澤湖舊有引河五道久經淤墊張福口引河

尙有涓涓細流天然引河尙有河形見在全黃直趨洪
湖由舊禮壩貫湖入運出江運河萬難容受應請

旨敕令漕督速挑天然引河由七堡口入涸黃河挖張福口

由順清河楊莊入涸黃河統由雙金閘入鹽河趨南六

塘河入海趕集夫工晝夜併進庶幾黃溜分洩爲患稍

輕至由成子河刷開舊黃隄以洩湖水其勢更易宜一

併速籌開放以資宣洩一下河五壩宜酌量開放也下

河五壩除昭關壩底已壞勢不可開外餘四壩皆有誌

椿限定開放尺寸每遇秋漲督臣因保護田禾往往已

逾誌椿尙不宣啟見在黃水勢大沿河隄身殘墊太多

冬閒又不礙田禾應請

旨敕令河督臣酌開數壩以備一壁虎橋等通江各鹽壩無庸堵閉也查邵伯以下舊有東西灣壩鳳凰橋瓦窑鋪引河壁虎橋等處盛漲開放宣洩河水冬間隨堵以備鹽艘南下見全黃下注水十倍於平時所有各壩應請一律啟放無庸堵築庶黃流得以迅速入江一宜調各路防營搶作高堰工程防守運河東隄也水勢浩大河工久停自難望其靈捷應調江皖各處防營分駐高堰及運河東隄一帶分段防守加築子堰搶做護埽冀辦公迅速而沿途流離失所之氓有所彈壓亦不爲宵小

燭惑致有他慮

光緒十三年九月運司福裕隄工局候補道吳修敬稟歸
江各壩向於春夏水勢漲發相機啟放秋冬水落酌量
堵蓄藉利運行歷經遵辦在案本年八月中旬鄭州決
口黃溜慮其南趨運河不患水淺初擬各壩任其暢通
藉資宣洩一月以來運河水勢幸未增長見值秋單鹽
引出場湧旺之時一經水落又慮難於運行會商再四
河防鹽務均關緊要自宜兼顧並籌以目下運河水勢
而論已與上年水落請堵情形相同鹽艘由場至壩由
壩達揚僅恃六閘一綫來源節逾霜清水涸愈速於鹽

運亦有關繫見擬先行委員前往各壩查看水勢長落
有無應修段落或先擇要堵築如果水勢增長卽行啟
放經鹽政會國荃批允並檄行各司道工程局黃溜趨
淮業經別籌分洩之策擬挑成子河碎石河俾由雲梯
關故道入海業經會奏在案惟查黃河地形高仰尙恐
挑濬未及竣工正濶直由高寶湖建瓴而下則南運河
倍形喫重舍啟壩外別無善策溯查道光年間迭次大
工均以下河爲歸墟能將下河疏通更多出路查東臺
興化兩縣境內支河甚多其最大者有四曰蚌蜒曰梓
辛曰白塗曰海溝蚌蜒河面較寬擬從緩挑梓辛白塗

海溝等河施工較易擬挑深四五尺底寬二丈卽以挑出之土於五丈外培築子堰即可順軌東流惟各河應挑工段各有若干約估工需若干其小海草堰各竈河應否一律疏通此外高郵鹽城境內有無應濬河道飭卽馳赴下河一帶確切分別履勘約估通稟察辦旋經委員候補知縣許善同稟卑職遵於九月自高郵起程由六閘進孔家涵先至興化梭織於向東各河測量深淺北至阜甯之射陽河復循范隄串場河而南厯閘十有八座計四十三孔金門共寬七十三丈一尺除出水通暢之閘河不復細量外內有閘河六處及丁溪小海

通海寵河二道並皆淤淺均經逐一履勘其有未及周
歷者亦必訪問居民詳加討論直至東臺而止伏查興
東鹽阜各邑下游河道全賴海口通暢中無阻滯方能
順軌東流尤宜注意於范隄以東各河昔時海口不下
八九處嗣經逐漸堙塞見止存射陽湖新羊港鬱龍港
三處出水幸皆通暢如丁溪古河口以下之竹港海口
小海王家港以下之大了子海口河道雖淤而河形尙
在大汛時亦復通潮趁此循其舊迹而疏通之究竟多
一出路蓋串場河爲諸河洩水之區而丁溪小海寵河
又爲串場河首先分洩要道非僅南五場出水去路實

東興兩邑諸河入海之尾閭自此二河淤塞後僅恃向
北窯港一綫之路假道於草堰竈河由鬪龍港入海何
能洩二縣五場之水來源多而迅速去路少而糾遲無
怪一遇大水之年農竈均皆受害第兩路並挑工程浩
大擇其尤要而行當以丁溪爲急緣小海本止西面受
水嗣因丁溪西南面之水不能東洩逼之北趨始形壅
滯若使丁溪直達海口卽小海之水或可就近分洩於
丁溪惟此二河待濬有年估非一次計自閘口至竹港
約有一百五十里之遙河底愈東愈高以下尙有新漲
沙灘約三十餘里前曾約估工需十四萬餘千文皆因

款無可籌遲延未辦此時如果興挑須確估方能定數
傳聞近海之數十里泉眼甚多游淤活沙在在皆有且
潮來立腳不住卑職竊以爲果能挑至近海之處縱使
旋挖旋淤上流業已疏通或可藉溜勢沖刷抑或沖刷
不動漫灘至海亦復何妨設因此而畏難疑慮恐日久
愈難興辦聽其堙塞未免可惜此外尙有興化之青龍
八竈大團等閘河鹽城之上岡北草堰閘河阜甯之溝
安墩閘河或淤淺三四十里或淤淺一二十里情形雖
各不同要皆阻塞水道儻能一律疏通亦可稍分水勢
六處閘河統計一百八十里工需亦得十餘萬千文若

范隄以西之蚌蜒梓辛車路白塗海溝等河自西至東原應深挑以期直注於閘外卽串場河亦應開段疏濬潦固可以容納旱亦不致立涸其利甚溥但見在水均不少難以施工如遇水淺之時亟宜次第辦理水利本宜隨時講求原不必因二瀆併流始行籌及也

附履勘下河並各閘清冊 一蚌蜒梓辛車路等河達丁溪 一白塗河達草堰 一海溝河達白駒 以上各河於九月中旬測量水深二尺七八寸至四尺餘寸不等河面寬十丈至二十丈各路水雖向東然南高北下餘波仍歸於北 一丁溪閘五孔金門共寬七丈八

尺距小海越閘六里見止北頭一孔過水餘四孔尙堵
閉此閘在東臺縣境內專洩西南路下注之水昔由沈
家竈古河口大溝子甜水洋竹港入海嗣因河底爲海
潮淤墊祇得向北經窑港草堰竈河由鬱龍港入海該
閘金門水深四尺閘塘水深三尺五寸至二尺八寸不
等有壩潮不得上自閘口至東柴河十五里水深二尺
至三尺二寸不等河面寬十七丈至二十丈至蔣家壩
十八里水深二尺五寸至三尺五寸不等河面寬十六
丈至二十三丈至沈家竈十二里水深三尺二寸至四
尺五寸不等河面寬二十丈至二十四丈至古河口十

三里水深三尺五寸至四尺六寸不等河面寬十五六丈至大溝子二十五里水深三尺四五寸至一尺四寸不等河面寬十二三丈至三四丈至彭家墩二十七里水深一尺二三寸至數寸不等愈東愈高河槽窄狹如溝下有攔潮壩一道壩外乾涸至竹港海口約四十里以下尚有新漲沙灘三十餘里查自大溝子以上水尙不小者曾經撈淺並賴下游攔潮壩及北面窯港房家壩堵蓄否則早淺涸矣一小海越閘雙孔金門共寬三丈二尺與正閘相連兩孔均尙堵閉一小海正閘雙孔金門共寬三丈三尺距草堰閘里半南孔見尙

堵閉磯心南面半邊倒卸放水甚險此二閘在東臺縣
境內昔由王家港入海嗣因東路淤塞祇得向北經窑
港草堰竈河由鬪龍港入海該閘金門水淤深三尺六
寸閘塘水深三尺有壩潮不得上自閘口至馬家園十
五里水深二尺至三尺不等河面寬十二丈至十六丈
至陳家舍十三里水深三尺至三尺五寸不等河面寬
十五丈至十九丈至窑港十二里水深三尺二寸至三
尺五寸不等河面寬十五丈至二十丈至小海竈十里
水深三尺二寸至四尺八寸不等河面寬十五丈至十
九丈至萬盈墩十里水深三尺二寸至四尺五寸不等

河面寬八丈至十五丈由萬盈墩折向東南經房家壩至古河口八里水深二尺六寸至四尺不等河面寬十五丈至十九丈由萬盈墩向東三十七里至王家港又十五里至潮水壩僅存河槽若無此壩蓄水上游旱涸又三十三里至大了子以下尙有沙灘約八九十里查丁溪小海通海河道及閘西之蚌蜒梓辛等河嘉慶十八年曾經挑挖於今七十五年宜乎淤塞是非善爲疏濬不能通暢一草堰閘雙孔金門共寬三丈三尺距葦港閘半里北孔見尙堵閉該閘金門水深七尺七寸水小潮不得上一葦港閘卽草堰閘三孔金門共寬

四丈八尺六寸距白駒南閘二十七里三孔均尙堵閉
磯心損壞 一白駒南閘雙孔金門共寬三丈六尺五
寸距白駒中閘二里兩孔均尙堵閉該閘金門水淤深
四尺七寸水小潮不得上 一白駒中閘一孔金門寬
一丈九尺與白駒北閘相連該閘金門水深六尺水小
潮不得上 一白駒北閘一孔金門寬一丈九尺距一
里墩閘不遠見尙堵閉 一一里墩閘五孔金門共寬
八丈八尺距青龍閘十六里五孔均尙堵閉 一劉莊
青龍閘雙孔金門共寬三丈三尺六寸距八竈閘三里
該閘金門水深四尺二寸水小潮不得上閘下約三十

里淤淺須挑 一劉莊八竈閘雙孔金門共寬三丈四尺距大團閘二十四里該閘金門水深五尺潮落時量閘下約四十里淤淺須挑 一劉莊大團閘雙孔金門

共寬三丈六尺距石磇閘五十五里南孔見尙堵閉該閘金門水深三尺二寸水落時量閘下約三十里淤淺須挑 以上九閘在興化縣境內皆由鬱龍港入海

一鹽城石磇閘雙孔金門共寬三丈二尺六寸距天妃閘三里該閘金門水深七尺潮落時量 一天妃閘五孔金門共寬八丈四尺七寸與越閘相去不遠該閘金門水深一丈五尺八寸潮落時量 一天妃越閘三孔

金門共寬五丈四尺距上岡閘四十五里該閘金門水深九尺九寸潮落時量以上三閘由新洋港入海最爲暢達一上岡閘一孔金門原寬一丈四尺五寸距北草堰閘二十八里南牆於道光二十八年沖塌今由北牆量至對岸塌處寬六丈五尺該閘金門水深五尺五寸潮落時量閘下四十五里淤淺須挑此河至小關合流由通洋港入射陽湖一北草堰閘一孔金門寬一丈六尺五寸距溝安閘十二里該閘金門水深五尺四寸潮落時量閘下十二里淤淺須挑此河歸溝安墩閘下三汊河合流至小關由通洋港入射陽湖一阜

甯溝安閘雙孔金門共寬三丈八尺范隄止此該閘南牆倒卸磯心損壞該閘金門水淤深五尺五寸潮落時量閘下二十八里淤淺須挑此河至小關合流由通洋港入射陽湖共閘十八座計四十三孔金門共寬七十三丈一尺查乾隆四十七年詳定章程每年三月初一日堵閉九月初一日啟放爲禦滬潮灌入田畝起見見在各閘堵閉者多並不以時啟放際此冬令潮落之時自應一律啟除俾資宣洩如有挑河之處暫從緩啟光緒十三年十月署淮揚海道劉鍾靈等稟奉檄黃水入淮一案見委南河候補同知萬青選查勘興化至舊黃

河身又委候補知縣許佐廷查勘大通口至灌河海口
檄道督同確查實在情形核議茲據萬丞稟遵經遴帶
弁兵於初十日自浦起程由水路厯寶應高郵下及邵
伯鎮入六閘經人字河攔江壩順看歸江去路再下孔
家涵經喬墅蕩樊汊凌亭閣等處於十六日由興化官
河抵興化縣會同該縣劉令查視各附近河道十七八
日厯護金蕩北官河沙溝鎮入西塘河過湖垛至射陽
河北岸之朦朧鎮十九日由射陽河抵阜甯縣會同該
縣曹令查勘射陽河入海去路二十一日由朦朧鎮沿
途測量高下厯侍家塢至舊黃河雲梯關以下之馬家

港卽大通口止查勘得朦朧屬於阜甯距興化縣東北二百三十餘里在射陽河北岸興化地勢極低四圍皆水東北一帶尤屬汪洋遼闊高郵壩水由澄子等河下注爲下河第一巨浸其閒河蕩紛歧水深六尺遞至八九尺不等其東北洩水之途射陽河最爲深通朦朧鎮至阜甯城南一帶水面寬約十餘丈至二十丈水深一丈六七尺愈東愈寬且深直達於海興化諸河蕩港汊甚多如蚌蜒梓辛車路白塗海溝興鹽界河等處皆爲洩水河道均由西至東以入於串場河串場河東岸卽係范公隄閘壩林立各就其順軌之勢分途入海此由

興化至朦朧行水河道以及見在洩水歸海之情形也至侍家塢地方屬阜甯境之舊黃河南岸遙偏朦朧西北相距五十里多係民田且有廬舍墳墓節節間雜見在並無河槽如議引水應開新河再自侍家塢入舊黃河過雲梯關東至馬家港卽大通口約三十五里其間小河僅寬三四丈水深二尺此又自朦朧至侍家塢並無河槽以及侍家塢至馬家港之情形也計由興化歷朦朧至馬家港三百餘里除朦朧以南行水河道不計外其應開之河尙有八十餘里長一萬五千數百丈較量高下黃河灘北高小河底一丈五尺南高侍家塢內

地一丈七尺內地南高朦朧射陽河水面約一丈八九
尺今以內地漸南漸低牽算土方如以過水五尺而計
約需挑深二丈五尺河底一律寬二丈以深配口計土
約二百餘萬方祇以地勢北高南下如不挑平下河水
不能出尤慮黃河之水就下南注不得不求其慎重耳
又據許令稟自大通口至福甯莊通潮河處止確查河
長八千七百十三丈五尺計程四十八里有奇應行挑
深方能通暢自福甯莊口至灌河海口計程百里而遙
潮河寬自六七十丈至百餘丈深自二丈五尺至三四
丈不等未至海口已屬一望無際是該河愈東愈寬愈

下愈深並灌河海口見尙通暢之實在情形也大凡治水必宜先通下游無論鄭州漫溢黃水下入洪澤湖固宜亟爲宣洩卽今冬明正鄭州堵合而清水多挽一分入黃河卽下河少受一分之害分洩之法首暢尾閼祇以黃河海口之外數十里沙互波中海船來往稍一不慎卽虞失事水旣不能暢流歸海黃河雖深洩消亦不能暢是以原奏有濬大通口入潮河由灌河出海之請也如能挑濬大通以下至福甯莊之四十餘里撇去黃河下游一百四五十里之平灘離海旣近河路亦深不特沂泗之水利導歸海卽淮水東注似必分洩較靈此

以見時情形案照原奏之興辦也特是雲梯關廟有嘉慶二十三年前河憲黎襄勤公撰海神廟碑記內有開馬家港通潮河入海而以雲梯關下黃河築壩攔塞河狹土膠水力不能攻刷上游潰決等語考其事蹟指康熙年間而言詢之附近居民不知馬家港之說或者昔年正黃河壩塞僅以馬家港一處洩黃以致不能容納今如查照原奏興辦大通雖開正河不塞且令分洩淮沂活水清流但有衝刷之功或無淤墊之病而況一河兩尾壅塞無虞似非康熙時所可同日語也卑職五年之內四勘此河大致若此博採興論開大通達潮河之

損益欣然者十之七八過慮者十之二三從此水不斷流鹽艘可改道逕達楊莊既不慮鹽河之乏水又節省西壩之旱行此外海船上駛百貨流通實與地方民情有益無損等情本司等查河南鄭州漫口全溜入淮匯注於洪澤一湖見在湖水已逐日見漲必入裏運河裏運河既極淺窄歸江口門又不寬暢河不能容勢必遞啟高郵各壩使之由射陽河鬪龍港入海以免東隄潰漫惟裏下河地勢低窪形如鍋底常年汎漲僅啟一二壩止分洩淮沂之水已不免有被水災患今以湍悍之黃水源源而來亟應多方疏導茲據許令查大通口尙

可挑通潮河寬深灌河海口見在通暢若開大通其正
黃河海口並不攔塞是一河兩尾黃水既可下行沂泗
之水亦不難分洩惟萬丞查勘朦朧至侍家塢並無河
槽多係民田且有廬舍墳墓節節閒雜況較量黃河灘
南高侍家塢內地一丈七尺內地南高朦朧射陽河水
面一丈八九尺如不挑平誠如萬丞所稟下河水不能
出尤慮舊黃河之水就下南注似不得不慎重辦理

附估工十二條 一大通口至福甯莊達潮河處共河
長八千七百十三丈五尺計程四十八里有奇雖閒有
河槽水塘不成河形應行挑深展寬方能通暢河約挑

深五六七尺不等底寬三丈兩面各二五收共挑河土
約二十六七萬方價自二百四十文至三百六十文不
等共約需錢七萬四千千內外一大通口須刷正越
兩隄切河灘挑夾塘一應土方工價均在上條河土之
內一大通口至福甯莊應築束水隄以資護衛第築
隄須層坯層硪錐試飽滿然後加築係屬緩工挑河以
速爲事出土便堆無暇行硪見擬以挑出河土各離十
丈坦坡爲攔堰祇須邊掀工夫先爲箱束俟河竣再議
翻築隄工以昭核實一攔堰高約五六七尺不等以
地勢高下配平連挑新河底以禦水一丈二尺爲度頂

寬一丈底寬一丈七八尺至四丈五六尺不等兩面各
五收除用河土外計不足土約十一萬方每方一百四
十文約錢一萬五六千千文 一前工用河土約二十
三四萬方掀夫擔坡錢四十文約錢九千四五千文
一工頭工尾留土攔堰工竣啟除約土一千五六百
方約錢六百千文 一大通至福甯莊四十餘里間有
河槽水塘土方已經挖除應計水方約十七萬一二千
方每方二十文約共錢三千四五百千文 一河槽水
塘而外尚有未估灘面積水應併治方能施工約十餘
萬方臨時察看積水大小再行確估見時估約錢二千

千文 一大通口河頭正越兩壩應廂做順水護埽以資保衛隄身正雜料土夫工約錢二千千文左右 一挑工陰雨不可不防挑夫飯食自當議及見時無從約數臨時照章支用核實造報 一工長土多似宜分段委員趕挑員弁薪水以兩月爲准見時無從約數照章支給實用實報 一歷來導淮河工隄工各局土方給夫其局廠雜用席片木板司事效兵飯食每方另給津貼似宜照行以資支用約需錢一萬六千千文

謹按鹽政批定先挑下河及順清河等處餘從緩辦光緒十三年九月鹽政曾國荃奏臣於九月初一日會同

署兩江督臣裕祿等奏明在於江蘇司局各庫無論何款提撥銀二十萬兩江甯司局各庫無論何款提撥銀十五萬兩分別咨行在案臣回抵金陵疊接撫臣崧駿來函已允飭司多方設法勉力如數籌解江甯司庫向來入不敷出據江甯藩司許振禱查明庫存銀兩開單呈核除地丁雜稅等款應備解旂綠各營督協四營漕標鎮標季餉蘆課一款應備解織造本年大運外所餘祇減存平餘等款銀一萬二千餘兩又均應彙解部庫釐捐本年收數雖較去年略增然亦因應撥之款太繁支絀已極而黃水業已入淮工程萬分緊急勢難日久

停待致誤事機不得不遵無論何款之奏先其所急擬於江甯司局等庫提撥應解光緒十三年阜甯等七州縣漕價銀六萬兩金陵釐捐局應解部庫籌邊軍餉銀二萬兩又應解部墊吉林練餉銀七萬兩刻下司局等庫並無如許存留不敷之數擬先向錢莊挪移俟司局各處收有成數於來年春季一律歸還請奏明立案前來臣查江甯各庫見時奇窘設法通融實爲萬不得已之舉已飭令趕緊籌解以應急需奉

硃批戶部知道欽此

光緒十三年十二月鹽政曾國荃等奏竊臣等欽奉本年

九月

寄諭翁同龢潘祖蔭奏黃河南決懇飭速籌堵塞並設法補救一摺著曾國荃盧士杰體察情形卽行籌議覆奏等因欽此仰見

朝廷眷顧東南保全完善之至意恭誦之下欽感莫名查江南自咸豐十年裁改河員以後堰盱減水各壩無款可籌均未修復舊禮壩俗名三河之處常年宣洩冲跌成塘洪湖之水由該處逕入高寶湖每值夏秋盛漲僅恃一綫漕隄爲屏障已屬岌岌可危今淮黃合而爲一并力南趨翁同龢潘祖蔭所呈二患五慮不啻身厯其

境將臣等所欲言者代達

宸聰考諸載籍前明潘季馴我

朝斲輔爲治河最著之臣其治之之法不外順其性而利導之惟水之性無古今之異而河之形有今昔之殊非確切履勘不可當經派委南河候補同知萬青選查勘興化至舊河身又派候補知縣許佐廷查勘大通口至灌河海口復經奏調江蘇臬司張富年赴興化一帶分投確勘勘得侍家塢屬阜甯縣境相距朦朧五十里都係民田廬舍墳墓節節閒雜並無河槽自侍家塢入舊黃河過雲梯關至大通口測量地勢北高一丈五七尺

不等揆諸就下之性殊未相宜不敢不恪遵

聖訓另於興化等邑境內別籌疏濬查下河入海河道以新洋射陽兩河爲最鬪龍港次之昔人沿范隄分建十八閘以資分洩法良意美祇以支河阻塞未能通暢見經

張富年查明興化所屬之大團閘及丁溪場所屬之古河口小海三河均極淤淺一遇水大之年來源多而迅速去路少而紓遲農竈均受其害疏濬以後各該處皆緊對漕隄如果高郵開壩可冀水皆順軌由新洋等河宣暢歸海其閘門窄狹過水不暢者另於左右開挖越河俾得滔滔直注見已估工興辦約需錢十餘萬串此

外幹支各河尙多俟前工辦有端倪再行接續擇要興
挑以期逐節通暢核與翁同龢潘祖蔭之奏事異功同
惟統計高郵三閘口門共寬祇一百九十六丈若全淮
之水合黃并注溜勢湍悍所洩之數不敵所受之數其
勢不能容納人所共知雖經臣等於上游張福口等處
興辦大工爲未放壩以前之綑繆復於下游入海要津
分別疏導爲已開壩以後之補救而來年大汛淮揚能
否弭患實未敢信有把握惟冀鄭州早日合龍則裏下
河百萬生靈免昏墾而登衽席大局幸甚奉

硃批據奏挑濬下河入海之路尙屬明晰此外幹支各河仍

著接續勘辦總期水多去路保全完善之區是爲至要欽此

光緒十三年十二月鹽政曾國荃等奏竊臣於本年九月奉

寄諭侍郎徐鹻奏通籌黃河全局一摺所陳辦法有業經特旨飭辦及該督等已奏請施行者此外各條是否有可采取卽著曾國荃等悉心酌核欽此臣等遵查該侍郎原摺內稱淮揚實無位置黃河之處先宜籌宣洩之方再力求堵合之法洵屬確中肯綮臣等一聞鄭州決口之信深知淮黃合溜南趨漕隄喫緊爲裏下河田廬民命所

關卽經奏請興挑成子碎石兩河實有急何能擇之勢
嗣經委員履勘成子河在洪湖上游與涸黃河不相連
貫非生開新河不能引水入黃該侍郎原摺是以有刷
開舊黃隄之說測量高處地勢高仰路遠費繁誠不易
關卽關之竊恐未必有效未敢虛擲鉅款已飭停止至
原奏請挑天然引河張福口引河與碎石河毗連本係
由淮入黃之咽喉昔人建導淮之議皆從各引河入手
祇以張福口河底淤墊太高挑不得法非徒無益且恐
沂泗之水倒灌而入又順清河爲清江三閘來源曩時
築壩堵閉以資保衛自黃河北徙此壩久廢今旣引淮

入黃仍須將順清河壩築堵如式庶三閘可保無虞而
跌塘甚深水溜甚急亦有不易施工之慮經臣等飭派
熟諳河工道員黃祖絡徐文達會同署淮揚海道劉鍾
靈詳加審度河底雖北高南低加工深挑尚可配平順
清河雖水深溜急多備料工亦可設法堵築又經臣士
杰另勘得陳家集窰頭地方可開引河上接張福口下
達吳城七堡與碎石河功用相同而施工較易遂往返
函商決計興挑已於十月二十一日開工自張福口內
窰河起至順清河止分爲三十八段揀派員弁按段承
挑向來挑河開深不過數尺至一丈內外工費已形繁

重此次須開深至一丈四五尺及二丈有奇不等實爲
從來所未有連分挑楊莊以下至雲梯關一帶舊黃河
工費核實估計約共需銀四五十萬兩明知籌款維艱
然關生靈財賦不得不以全力赴之以冀上游多洩一
分之水卽下河少受一分之災至高郵五壩已損者二
可開者三湖水滔滔下注截至十月三十日止案高郵
汎誌椿已存水一丈二尺二寸較之本年伏秋盛漲時
已多二寸據隄工局稟請酌量啟壩臣等查冬令西北
風猛隄工喫重保隄卽所以衛民且下河方在水涸之
時車邏壩洩水較緩開放無礙臣士杰前雖奏明以誌

椿一丈四尺爲准然事機緊迫未敢拘泥已批令先啟車邇一壩餘仍察看水勢得守且守本年邇河通江各壩重門洞開以便宣暢入江其工段中如舊黃河等處可以就近酌調營勇協助者閒調哨勇幫同挑濬酌給津貼賞號以補民夫之不足以上辦法核與該侍郎所奏江南數條均屬不謀而合惟河工積習弊竇滋深必須一律埽除庶幾工歸實濟奉

硃批卽著該督等嚴飭各員認真挑濬務於春汎前剋期歲事以資宣洩欽此

光緒十四年正月臬司張富年稟古河口爲高泰東興四

州縣暨富豐梁東河五場第一洩水要道緣南五場縣
亘一百餘里范隄以東均無海口所有南鹽河及蚌蜒
梓辛車路等河暨南五場各河之水悉由該處入海且
丁溪閘緊對高郵三壩壩水下注首當其衝而古河口
以乾隆季年淤墊嘉慶十八年曾挑一次僅至小汊而
止距海尙遠未曾通達是以沙土增積水轉逆流數十
年來丁溪之水由房家壩繞出窑港北流假道草堰西
團下闢龍港不足宣洩商竈恐路少而來源多轉在閘
外圈築攔壩名爲禦潮實使水不得入西南來水僅恃
一綫串場河北注而草堰閘有白塗河水頂託白駒閘

有海溝河水頂託一遇大水卽有倒漾橫溢之虞南五場每當大雨時行溝澗皆盈尤苦水無出路必須將古河口以東一律疏通導出竹港暢流歸海方足以洩盛漲而免壅遏

光緒十四年二月臬司張富年稟下河幹支各河不下數十道應擇其來源旺而去路暢者分別疏通茲查興化縣劉莊場范隄以東青龍八竈兩河均爲串場河洩水要道測量閘底八竈較低且在興鹽界河以北兼受界河之水宣洩較暢擬將八竈河先行疏濬以期西南兩路之水滔滔下注直達鬱龍港

光緒十四年五月鹽政曾國荃等奏竊臣等於光緒十三
年十二月初四日具奏下河河道查明興化縣所屬之
大團閘丁溪場所屬之古河口小海三處應行興挑一

摺欽奉

硃批允行當飭臬司張富年將幹支各河何者可緩何者須
挑詳加審度又以下河地勢低窪漕隄開壩勢等建瓴
雖經開通入海之路而來勢洶湧總不免有漫溢之虞
若能仿照沿江築圩之法擇要築隄與挑河相輔而行
尤足以衛田廬又淮南丁溪草堰伍祐新興四場坐落
東臺興化鹽城縣境額產居淮南之半存鹽不下數十

萬引亦須設法保護以重課餉經張富年親駐工處往來調度以得人省費爲辦工第一要義稟保江蘇候補知府許寶書候補知縣許善同充通工提調該二員向在隄工局當差勤慎耐勞熟諳下河情形勘明支河中以興化之八竈河鹽城之減水河尤能減洩盛漲稟定接續舉辦督率各工員弁核定土方次第興挑給發夫價盡係通足制錢不折不扣民夫踴躍樂於赴事截至四月十四日止自大團閘而古河口而小海而八竈河而減水河先後報竣經臣等派委江蘇候補道曾廣照馳往驗收工皆如式核諸原估丈尺均尚有餘此承挑

河道之情形也下河係屬水鄉從前居民建築舊隄到處皆有類皆年久失修不足以資捍衛張富年勸諭官紳將舊有殘缺之隄修補培厚空隙無隄之處仿照興築統歸民捐民辦富者出資貧者出力慎選紳董不假吏役之手並派妥員會同印官認真監催其經費不足者卽在挑河款內量予津貼除興化西南一帶地勢最低鄰莊半在湖蕩之中無土可取不能建隄外其泰州北鄉舊有長圩一道計六十里東爲東臺縣境未經接築每遇大水仍不免橫流旁溢今將泰州舊隄加高復自東臺縣治循海道口沿蚌蜒河南岸至唐蔣莊九十一

里接築長隄與泰州舊隄聯而爲一高出水面一丈以
外最爲堅厚此外高郵舊有六圩尙爲完整其坍廢者
補之未有者築之亦成鱗次相接之勢鹽城舊有八十
二圩僅數處整齊餘皆多年未修祇存圩基今一律培
築高厚並築新圩十二處統以禦水一丈爲率興化亦
擇其有土可取之處築新圩兩處舊有八圩均已分別
加修此修築隄圩之情形也鹽務以場竈爲根本自川
鹽占淮引地產多銷少以致存鹽積壓幾無隙地可堆
岌不可終日今就臨水最近存鹽最多之丁溪等四場

相度垣地築圩圈護其無可防護之垣飭由運司妥議
章程准其先期移屯泰州商情亦復大定此籌保場垣
之情形也總之心力難盡之處均經張富年不避嫌怨
不辭勞瘁慘淡經營一律告歲弭患雖未敢預必而減
災似確有可憑據該臬司稟請銷差前來除飭將撥用
經費十一萬兩造呈細冊咨部核銷外謹合詞具奏奉
硃批該部知道欽此

光緒十五年八月高郵州知州謝國恩稟竊查北關人字
兩河坐落運鹽河之北向係分洩灞水之處光緒十三
年鄭州河決黃水會淮南趨原任張臬司勸築圩岸爲

未雨綢繆之計將該兩河口門堵塞奉督憲曾檄漕憲
盧批均以北關人字兩河爲堵水北趨歸海要道向不
堵閉亟應仍舊以資宣洩於本年七月二十六日將北
關河口開通正擬接辦人字河口門而附近農民以開
通後水必漫溢有患田畝糾眾阻擋經江督曾國荃飭
該處營汛彈壓一律開通

光緒十五年十一月鹽政曾國荃奏光緒十三年河南鄭
工漫口黃溜東注淮南地處下游宜籌分洩之策經奏
明全淮之水由三河壩直趨而東運隄極爲喫重勢不
能不開壩宣洩裏下河形如鍋底而枝河頗多若能預

先疏導使水能順軌不致漫溢則農田民命均可保全
比卽奏派臬司張富年查明興化縣所屬之大團閘丁
溪場所屬之古河口小海三河均極淤淺一遇大水之
年來源多而迅速去路少而紓遲農竈均受其害疏濬
以後各該處皆緊對漕隄如果高郵開壩可冀水皆順
軌由新洋等河宣洩歸海卽經估工興辦後又續勘得
支河中興化之八竈河鹽城之減水河尤能減洩盛漲
經臣等督辦以上各工截至十四年四月十四日止先
後一律報竣旋委江蘇候補道曾廣照馳往驗收工皆
如式核諸原估丈尺均尙有餘據淮揚道將該故臬司

做過各工共計動用銀十萬九千六百二十七兩有奇
均係實用毫無浮冒並開單詳請奏咨前來除分咨戶
工二部查照外伏乞

敕部核銷嗣經工部奏據兩江總督曾國荃等奏稱光緒十
三年河南鄭州漫口匯淮東注江北淮南數十州縣地
居下游亟宜修守舊工別籌分洩經臣節次奏明一面
奏撥經費一面派委道員調集員弁雇募民夫興挑窖
河又順清河上游築擋河土堰北岸刷隄放水其楊莊
以下舊黃河係派候補道徐文達會同淮揚鎮總兵章
合才承辦有兼雇長夫與勇合挑者有另派委員雇夫

承挑者旋因配平上游窰河新底加抽深溝並將殘缺舊隄擇要修補雲梯關以下應切河泓淺灘於十四年三月一律工竣業經前漕臣盧士杰親臨查驗此外展寬張福口切灘又在裏河下游廂做托壩窰河對岸建築挑壩等工次第舉辦完竣共計動用銀四十八萬九百四十八兩有奇均係實用實銷繕單具奏等因並據該督將冊結咨送到部臣等查此案曾於光緒十三年十二月經兩江督臣曾國荃前漕臣盧士杰前江蘇撫臣崧駿於覆陳遵

旨妥籌應挑洪湖引河摺內業將辦理情形奏蒙

聖鑒嗣於十四年三月一律工竣復經前漕臣盧士杰親臨
驗收亦經奏報在案今查單開襄河所屬新開窰河一
道自工頭起至順清河工尾止共工長二千五百八十一
五丈展寬張福口引河兩岸切灘共工長六千一百十
八丈五尺堵築順清河壩一道共工長三十六丈澆築
土硪長三十六丈上游築做攔河土堰共工長三十九
丈三尺北岸刷隄放水工長五十丈窰河頭築做挑水
壩一道共工長五十五丈上水廂做護埽二十丈堰坪
所屬禮字河下游築做托水壩一道共工長六十丈淮
揚所屬幫水隄工共工長一千五百九十丈六尺楊莊

以下舊黃河勇夫合挑共工長三千九百三十七丈派
員挑竣雲梯關一帶舊黃河共工長二千七百七十八
丈加挑楊莊以下舊黃河深溝共工長二千七百九十一
丈修補楊莊以下舊黃河兩岸殘缺舊隄共工長一千
九百二十三丈展切雲梯關以下舊黃河兩岸淺灘
共工長二千二百四十九丈以上各工除由營勇承挑
者不開土方價值外綜計用過料土夫工銀四十八萬
九百四十八兩六錢九釐臣部案照冊造詳加確核所
開工穢丈尺銀數悉與奏報清單相符其工料價值與
例亦屬無浮應請准其開銷以清款目至動撥銀款之

處應由該督自行報明戶部查核再鄭州漫口之後曾
國荃等會奏請修守舊工並議將桃源縣境內之成子
河清河縣境內之碎石河大加挑挖以爲分洩之計奏
撥銀三十五萬兩續經奏請開濬下河估需錢十餘萬
串以上二案除成子河因與涸黃河不相連貫已經停
止外其餘各工前因延不造報經臣部於上年奏催在
案迄今又逾數月之久仍未造報到部似此任意延宕
殊非慎帑重工之道擬再請

旨敕下兩江漕運各督臣江蘇撫臣迅將此二案實用經費
先行開單具奏一面轉飭趕緊造冊送部核銷統限於

年內完結以清積案而昭核實又奏都水司案呈兩江
總督曾國荃奏稱光緒十三年河南鄭州漫口黃濬東
注淮南地處下游宜籌分洩之策經臣等奏派已故江
蘇臬司張富年查明興化縣所屬之大團閘丁溪場所
屬之古河口小海三河均極淤淺卽經估工興辦後又
續勘得支河中以興化之八竈河鹽城之減水河尤能
減洩盛漲經臣等督飭次第舉辦以上各工截至十四
年四月一律報竣派委江蘇候補道曾廣照馳往驗收
如式先後奏報在案茲據淮揚海道將該故臬司做過
各工共計動用銀十萬九千六百二十七兩有奇均係

實用實銷毫無浮冒造冊開單詳請奏咨前來謹會同
護漕督臣徐文達江蘇撫臣剛毅繕具清單具奏等因
並據該督將冊籍咨送到部臣等查此案曾於光緒十
三年十二月經兩江總督曾國荃前漕運總督盧士杰
前江蘇巡撫崧駿遵

旨體察開濬下河情形覆奏摺內縷晰陳明嗣於十四年五
月該督等奏報是年四月一律完竣派員驗收如式復
經奏明在案今據原奏單開挑濬東臺縣屬丁溪閘河
計工長一萬一百十一丈東臺縣屬小海閘河計工長
七千二百十丈興化縣屬劉莊場八竈閘河計工長六

千二百三十五丈興化縣屬大團閘引河計工長五千
二百三十六丈鹽城縣屬童家舍減水新河計工長二
千一百三十五丈九尺並先於各河上首築做攔河土
堰一道以便施工統計共用土方銀十萬九千六百二
十七兩二錢六分三釐五毫臣部按照冊造詳加確核
所報丈尺銀數與奏報清單相符其土方價值亦屬無
浮應請准其開銷以清款目至此案動撥銀款之處應
由該督自行報明戶部查核

謹按以上因黃水入淮挑濬淮揚各河

兩淮鹽法志卷六十八

引言

卷六十八

鹽運門 蘇海四

七

兩淮鹽法志卷六十九

轉運門

融銷 提綱

融銷者此盈彼絀互相轉移然挹注之間引目加多或且爲暢岸之累彼此兩病焉提綱與統銷相反而實相類統銷者舉前綱積滯之引攤入下綱提綱者舉後綱未來之引分年預帶及其弊也逋欠至千餘萬兩追呼督責商力亦既殫矣其不至於概予蠲除不已也志融銷而以提綱附焉

順治六年五月巡鹽御史崔應宏奏兩淮歲額一百四十

餘萬引丁亥定額以來淮北認行二十二萬引有奇餘
皆淮南銷運至戊子議加淮北引窩一十二萬業已停
歷二年前任鹽臣因淮北商疲所加戊己之引仍係淮

南運銷臣念淮北歲行二十二萬引尙苦壅滯所恃南
地通融以足歲額莫若以甯國等屬之窩轉銷淮北增
窩之引等因戶部議淮北增引不便當照舊運行淮南
其甯國江都食鹽引課原不在淮南綱引正數之內未
便通融誤課互見引目

康熙八年五月巡鹽御史郭不疏言上江等八縣改行食
鹽於順治十五年題行納課至十七年方始行鹽因此

將一年之引壅滯至今未銷查上元等縣壅滯鹽六萬八千三百十二引商人張子謙等旣係行淮南食鹽將食鹽所行甯國和州含山六合全椒句容高淳七處可以少爲通融代銷限五年內酌量代行銷完部議淮北壅引曾有改於淮南行銷之例今上元等縣壅積之引若俟五年內銷完爲期太久應限二年內酌量於行食鹽之甯國等七處銷完仍取七處甘結送部

康熙十年八月巡鹽御史席特納等疏言淮北之山陽清河桃源宿遷邳州五州縣食鹽地方連年水患戶口逃亡戊申己酉食鹽俱停壓未賣若庚戌一綱再令壅積

商食愈乏課無所出查山清等五州縣共二萬二千八百六十引今將庚戌一綱暫改一半計一萬一千九百三十引於淮北綱地照綱鹽額重運銷以北改北綱食商人均無異議儻五州縣戶口全復則食窩仍歸食地運行至江都爲淮南綱食引鹽之門戶兵糧座船凡有夾帶者畏懼搜盤莫不潛卸於江都境內加之連年水潦飢民自場來揚就食者人多帶鹽數斤或十餘斤爲沿途度日之計江都鹽滯職此之故今江都應行庚戌一綱二萬六千七百一十引之內撥派七千引改於甯國和州含山句容高淳六合全椒七處食地分銷一年

嗣後仍各歸各地庶商困少甦歲課不絀戶部議覆暫准分銷一年

康熙二十七年以河南陳州等六屬既改食蘆鹽其舊欠淮北未銷之引應責淮北地方通融銷繳

康熙四十九年十月戶部覆准巡鹽御史李煦等題請將湖廣衡州等處鹽引俱行一例通融銷售

雍正三年正月戶部議覆巡鹽御史噶爾泰疏言食鹽難銷之處值有綱地行銷不敷臨時改撥等語查兩淮食鹽之課輕於綱鹽如果有綱地行銷不敷之處應將何府州縣可銷若干查明具題再爲改撥照綱輸課暫濟

民食俟各場煎辦旺足卽行停止嗣因食鹽口岸並無
難銷綱地亦無不敷題准部覆無庸另爲改撥

雍正七年六月逆司高純詳淮北綱食引鹽二十五萬餘
引向年從佃湖運行赴壩繼因中河開濬運路稍近遂
舍佃湖故道盡走中河比年外河日下中河日淤加以
河工料船阻塞綱引亦難依期赴掣食鹽竟至沈閻自
癸卯運行之後歷今見存未運甲乙丙丁四綱食引淮
北商力寡薄歲額正供尙多竭歷若再加有課無鹽之
累實不能支據各商援例請將甲辰食鹽星運以濟民
食其乙丙等綱食鹽於丁未綱鹽內每單引帶運三

十斤陸續行銷少充歲額伏查淮北食鹽口岸向來原有食商辦運繼因私充課紬食商消乏逃亡故行鹽辦課悉歸於淮北綱商代爲輸折乃口岸壅滯引目難銷於康熙四十八年稟准自甲申綱起於綱鹽內每引帶食三十斤其間十數綱來或運行或帶斤總視口岸能銷則爲辦運口岸壅滯則請帶斤清課額而甦商困亦因時補救之道也經巡鹽御史噶爾泰批如詳行

謹按淮北食鹽從前每帶於綱地行銷雍正十年兩江總督尹繼善於酌籌除弊緝私案內亦經奏明原

委詳見引目商課

乾隆二年閏九月戶部議覆鹽政三保等題吉安壅引改
撥饒州一疏言查先據原任江西巡撫俞兆晟奏吉安
一府額行五萬一千五百四引雍正八年奉

世宗憲皇帝諭旨交與淮商黃光德辦理其時前商安瑞成尙
存殘鹽一百六十五萬包遂將黃光德運到鹽斤封閉
年餘壅滯十萬餘引吉屬每歲僅可銷本年之見引而
舊存之十萬餘引終不能賣饒州一府原額行銷六萬
七千一百三十七引因鄱湖阻隔省鹽難以運往故將
原額攤派別地雍正七年鹽臣噶爾泰題請另行二萬
引雍正十二年鹽臣高斌另籤十商往辦連年禁緝私

販官引暢銷鹽不足用屢借吉鹽接濟請將吉安二萬
引鹽改運饒州約計五年之內吉安之積鹽可以盡銷
饒州之額引可以增益臣部以饒州果否不足吉安果
否壅滯並吉安二萬引可否改運饒州均難遽議當行
兩淮鹽政兩江總督江西巡撫逐一詳查妥議今據該
鹽政等疏稱吉鹽壅滯饒鹽不足皆屬實情惟饒州雖
漸見疏銷而見在情形每綱僅可銷至三萬四五千引
若驟令行引四萬誠恐又滋壅滯應請自丁巳綱爲始
將吉安鹽斤暫撥一萬五千引飭饒商代運行銷儻仍
不敷隨時增撥數綱以後吉鹽全銷則吉安仍可復其

原額而饒引已可定數卽於原攤通綱引內酌請撥歸
以足銷數應如所題暫撥行銷其饒州原額已經攤派
通綱行運未便復行撥歸致滋紛擾自應另增引目以
足饒州應銷之數

謹按後於乾隆四年饒州增引一萬五千道詳見引
目

乾隆七年六月鹽政準奏疏言淮北綱鹽未完額引請通
融行銷一案經前鹽臣高斌三次題請屢奉部駁令照
額行銷倘有不能銷完之處改撥於額引不敷地方作
爲定額報部行據運司朱續暉具詳改撥引目必須酌

量地方戶口多寡以爲定額今淮北綱鹽口岸有銷不足額之處係偶因年歲歉收並非該州縣戶口稀少原難指定某州某縣應增應減若遽將引目增減作爲定額誠恐日後增引之地難以疏銷而減額之區又慮茹淡翻致周章但淮北運銷安豫兩省地方遼闊年歲難以預料今據各商援例呼籲復經移查長蘆引鹽於乾隆三年間題請融銷又於六年長蘆鹽政三保奏明循舊融銷俱奉

旨准行在案淮北不能銷完額引應請援照長蘆之例於淮北綱鹽口岸通融運銷仍於奏銷疏內聲明改撥代銷緣

由將殘引送部稽查部議長蘆艱於疏銷引目臣部原
議偶遇歉收始准代銷其無論豐歉概准通融銷售係
奉

特旨兌行並非著爲定例他處未便援引所有亳太等十一州
縣淮北綱引應令該鹽政嗣後遇歉收之年於奏銷後
確查實在不能銷售引數題明暫准酌撥融銷其照常
之年自應仍遵舊例按照疆界各銷各引奉

旨著照該鹽政所請行欽此

乾隆九年五月鹽政準奏以吉安商人程可正本懸力紬
呈請更替應照饒州之例改派十商接辦其舊商積鹽

循照向例設法通融以清壅滯行據運司朱續焯詳吉安爲積壅口岸雖節經改撥融銷終無起色今新商接辦若欲照額全運全銷勢必不能應請照黃光德程可正二商辦理時每綱先改撥二萬引於江西省埠融銷但口岸壅滯隨時而變酌議於綱首先行改撥一萬引其餘一萬引在於綱尾核計按吉岸月報存鹽數目如足敷民食則照數改撥西省如吉岸不敷則將此一萬引內臨時酌定引數運赴吉安接濟餘仍撥省再每綱改撥之二萬引應請併於應運西省月額內扣算作數以免西省壅積仍飭十商協力整頓以固藩籬經鹽政

批允飭遵

謹按後於乾隆二十八年吉安改歸通綱運銷詳見

引目

乾隆十年十二月戶部議覆兩江總督尹繼善鹽政吉慶會奏食鹽難銷請俯准通融調劑一摺查先於乾隆九年六月內據署理兩江總督尹繼善等奏稱淮北行銷食鹽之山陽清河桃源邳州宿遷睢寧贛榆沐陽八州縣地方土瘠民貧又皆逼近鹽場壩所貧難老弱零換竈鹽及埽積泥鹽小民貪賤買食遂致官鹽壅積不銷請自甲子綱爲始將三分運赴八州縣行銷其餘七分

於綱鹽口岸每單引帶運三十斤飭令運司於綱鹽行
運水程內註明加帶食鹽斤數鈐蓋院司印信沿途查
驗經大學士會同臣部議以商人照引行鹽尙虞夾帶
今止於水程內註明斤數安保其不透運行私查淮北
行銷綱鹽先於乾隆七年據該鹽政題請通融案內因
何不將食鹽一併奏請而於今日更議帶運此項食鹽
可否與綱鹽一體通融之處應令查明再議續據該署
鹽政吉慶等以綱鹽一引帶運食鹽三十斤細加酌核
究不若分包各運與綱鹽一體通融爲便節次疏請均
經題駁在案今復據該鹽政奏請仍照前議融銷臣等

伏查淮北山清等州縣年運食引僅止二萬六千餘道
從前酌派引目自必照能銷情形量爲核定豈行之久
遠戶口益增而引鹽轉致難銷如以各該州縣地近場
竈貧難老弱零換竈鹽則各省附場之區均有老少貧
民換買零鹽而每年行銷鹽引未嘗不按額全完何獨
山清等八州縣遂有官引壅滯之患該鹽政不務設法
緝私以清食地積壓之源而請以分撥綱地融銷致啟
混淆侵越之端揆之定制究屬未協應將所請融撥綱
地之處仍毋庸議奉

旨著暫准其所請行銷俟一二年後食鹽疏通之日該鹽政奏

閩仍照定例辦理欽此嗣於乾隆十六年十月經鹽政吉慶奏准自庚午綱爲始以五分留運食岸以五分融銷綱地照綱輸課迨三十二年鹽政普福奏明自丁亥綱起以七分留運食岸其餘三分仍暫融綱地行銷復於三十四年二月鹽政尤拔世以復還原額二分之後積鹽壅滯奏請自己丑綱起仍照舊例以五分融綱五分運

食經部議駁

恭載

上諭一道
制詔

乾隆十一年閏三月戶部議覆署鹽政吉慶奏淮南食鹽壅壓再懇融撥綱地分年帶銷一摺查先於乾隆十年七月內據該署鹽政奏稱淮南甯國上元江甯句容溧

水高湧六合江都甘泉等九縣食鹽口岸素爲額引難
銷之區復緣比年春冬少雨蔬菜不熟民間用鹽減少
自甲子綱起至乙丑綱共壅壓引鹽十萬三千一百三
十引各食商頻以資本滯擋無資辦運請將前項壅存
食引遵照雍正二年題定之案派撥與淮南綱地行銷
照綱輸課經臣部議以兩淮鹽法綱食各分口岸原所
以清疆界而杜混淆從前該處難銷食鹽曾經題准改
撥於綱地不敷州縣行銷祇因各場自雍正二年海潮
淹沒之後竈戶煎辦不繼惟恐有誤民食是以前任鹽
政噶爾泰題請臨時改撥准其照綱輸課暫爲接濟旋

卽題明停止並未著爲定例且淮屬食鹽節年行銷引
目俱係照額全完何獨見今因蔬菜不熟致有病商糲
課之虞明係各該州縣緝私不嚴督銷不力所致應將
所請毋庸議等因題覆在案今據該署鹽政吉慶復以
見在壅壓甲乙兩綱食引共十萬一千二百九十一道
緣帶戊之後復接帶乙每年多此一分引鹽又因比年
蔬菜不熟以致積壓奏請自丙寅綱爲始分作五年派
撥綱地融銷臣等伏查甯國等處所帶戊申乙卯兩綱
食鹽自雍正七年提出帶運以來各分十年帶銷迄今
十有餘載俱已照數清完未聞引壅鹽積至謂比年蔬

菜不熟民用減少夫年歲豐歉時有不齊何以從前並
未壅積獨甲乙兩綱遂有積壓之虞今以食商額銷之
引責令綱商代銷輸課揆之定制究屬未協且查淮南
綱地見據該鹽政奏請預提甲戌額引一百四十餘萬
道每年約數領銷若將甯國等九縣未完食引分撥綱
地代運則該地應行歲額及預提綱引轉爲食鹽所占
必致壅積難銷尤爲未便應將該鹽政所奏毋庸議欽

奉

特旨准將甯國等九縣壅積食鹽派撥淮南綱商於江廣口岸

分年報運融銷

恭載

上諭一道
制詔門

乾隆十九年七月鹽政吉慶奏淮南行銷食鹽之句容深
水六合三縣濱臨大江鄰私易越本係最難銷引之地
上年夏旱秋潦菜蔬不熟民間銷鹽甚滯見今句容尙
壅積辛壬癸三綱八千八百三十四引溧水尙壅積壬
癸二綱九千七百四十三引六合尙壅積辛壬癸三綱
八千一百三十八引共壅積二萬六千七百一十五引
請循例將句容等邑積引令綱商領運融銷照綱陞課
俾疏壅滯奉

硃批知道了欽此

乾隆二十四年二月戶部議覆鹽政高恆奏江都甘泉高

郵寶應泰興甯國和州含山上元江甯句容溧水高淳
全椒六合江浦十六口岸共壅積食引十八萬餘道請
頒往例改撥綱地融銷照綱陞課一摺查兩淮行鹽口
岸例分綱食引目各殊難容混淆從前奏請融銷歷經
臣部議駁荷蒙

特旨准其暫行融銷非可援以爲例今卽有壅滯亦祇宜於食
岸設法融銷豈得派撥綱地致啟越界之端其江甘二
縣逼近場竈尤爲私鹽充斥之所若一經派撥綱地非
特私鹽愈滋透越將見綱鹽口岸悉爲食引所占殊於
鹽法有礙所請應毋庸議奉

旨高寶等十四州縣著照該鹽政所請行其江都甘泉二縣照

部議不准撥綱行銷

乾隆二十六年四月大學士公傅恆等條奏食鹽融銷不過偶爾權宜之計儻任意通融綱引卽難暢銷應令嗣後行銷鹽引須分綱食不得濫行通融復經鹽政高恆具奏食鹽融銷原屬相機權宜不得濫爲通融但果遇食岸壅滯綱地旺銷亦當據實奏請以食岸之所餘濟綱地之不足於課食商本均有裨益奉

旨如所議行欽此

乾隆三十五年九月戶部議覆兩江總督高晉等覆奏江

都甘泉二縣食引難消請自庚寅綱起通出五分融銷
綱地一摺前據該鹽政奏請融綱經臣部照例議駁今
據該督等會議覆奏江甘戊子綱鹽未銷己丑綱鹽未
運新舊積壓實有難以銷售之勢該督撫鹽政身臨其
地所稱該商等願將己丑未運之引納課銃銷其爲官
鹽壅滯似屬實在情形至所請江甘二縣食引通出五
分融銷綱地之處例不准行但旣將己丑綱未運之引
納課銃銷融綱銷售係屬疏通官引起見可否照該督
等所奏自庚寅綱起暫准融銷照綱陞課俟二三年後
積鹽疏通酌復原額出自

天恩奉

旨依議欽此嗣於三十九年鹽政李質穎以江甘二縣滯銷如
故請將通出五分食引永遠融綱奏奉部議仍准以五
分暫爲融綱俟積鹽銷完之後再試行一年所有本綱
留運五分食鹽於民食有無缺乏之處臨期確按情形
再行奏報核辦迨五十六年三月鹽政全德以淮南口
岸銷鹽漸有起色奏准將江甘五分融引收回本岸以
復舊額卽銷不及額亦祇於各食岸通融袁益隨時報
部復於五十八年八月戶部覆准鹽政巴甯阿奏江甘
應銷鹽引撤回本岸之後積鹽愈多實難照額行銷自

癸丑綱起仍以五分留運本岸五分融銷綱地

謹按乾隆四十年奏准融綱窩價歸公詳見商課
乾隆五十三年六月鹽政全德奏請融銷一摺奉

上諭緣何一任商人先儘融銷有無弊竇之處據實查明覆奏
欽此臣查向例滯銷口岸之鹽原准於楚省暢銷地而
通融售賣其江西及池州太平安慶等岸額引本係綱
鹽與楚省綱鹽一體納課以綱融綱固無避重就輕之
處卽揚州江甘二縣食鹽亦有奏明融銷楚省者食鹽
課輕照綱納課之外每引又納窩價銀一兩報部歸公
此融綱之鹽並無弊竇也惟是別岸滯鹽融銷楚省向

來聽其隨到隨賣嗣後正鹽未到卽將已到之融鹽抵
作正額則辦理更爲畫一部議行鹽各有地面向來同
省州縣或有此滯融彼之事至隔省鹽斤除江都甘泉
二縣食鹽奏明融銷楚省外其餘並無准其通融代售
者何以他省鹽斤准至楚省越界銷售且果係兩地通
融自應於滯銷之後始運至暢銷地面何得有正鹽未
來融鹽先到情事該鹽政所奏殊未曉晰請

旨飭令該鹽政查明實在情形卽行分晰覆奏嗣經全德覆奏
湖廣爲暢銷地面而江西與浙閩粵三省毗連鄰私入
境官運不能銷售足額是以歷於綱首查核前綱暢滯

情形衰益分派以期無壅無缺卽如乾隆二十八年鹽政高恆將通綱一百三萬餘引內江西省僅派三十萬引嗣因銷售仍難足額三十一年鹽政普福又改派二十八萬引三十四年鹽政尤拔世並改派至二十三萬餘引以後雖有增減大概總不離此數其餘悉歸湖廣行銷此向來湖廣江西融銷章程也其江南之安池太三府本有定額而該處在在瀕江私鹽闖入以致官引積壓三十四年鹽政尤拔世准池太商人呈請以四分融楚六分留銷本岸五十二年鹽政徵瑞又淮安慶商人援池太之例呈請亦以四分融楚此又池太安三府

融銷之成案也其分融多寡每綱奏銷時於冊內分別註明厯年報部有案至兩地通融原應以滯銷之後始聽其融楚無如自場運楚動須三四月之久若俟滯銷成數始令改運則已在一綱將完之後及運至楚省舊綱已完又在新綱銷售限內諸多窒礙是以向來酌定應留應融分數俟本岸之引請運過半卽給與融引運楚其間商力不齊或運正引者未到而運融引者已到致有參差並非正引之商卽融引之商有意先融後正經部議覆嗣後如正鹽未到卽將已到之融鹽抵作正額以清年額而杜影射並令各該督撫鹽政嚴飭江西

安徽文武員弁實力緝私以期轉滯爲暢

嘉慶四年十二月戶部議覆鹽政書魯奏淮北引鹽積壓
請將己庚兩綱各提出五萬併引融銷淮南一摺查兩
淮綱鹽雖行銷各有疆界而綱課辦運事同一體該鹽
政既稱淮北商力疲乏遞年積壓必當亟爲設法疏通
自係實在情形應准其暫爲通融於己未庚申兩綱內
每綱各提出五萬併引融銷淮南江廣等岸照淮南綱
鹽引課之數一體陞納奉

旨依議欽此

嘉慶八年七月鹽政信山奏淮北綱鹽每年應運十四萬

一千餘併引見在辦運祇有十二商人半屬資本缺乏
又兼河道艱阻轉運維艱壬戌綱鹽尙有未運九萬餘
併引轉瞬旣屆奏銷萬難趕辦完額且癸亥見在開綱
若令新殘並運不惟商力不繼抑且岸銷疲滯積壓更
多查嘉慶四年曾經前鹽政書魯奏准將己庚兩綱各
提五萬併引融銷淮南江廣口岸在案今淮北壬戌未
銷引鹽合無仰懇

聖恩准暫融撥五萬併引以疏積壓此項融銷之引照淮南綱
鹽引課一禮陞納入於癸亥綱引同正引一併奏銷奉

旨允行

恭載

上諭一道制詔門

轉運門 融銷 提調

二六

道光十二年九月江西鹽道稟饒州府七縣共應銷鹽二萬二千引饒岸課則每引減銀八錢五分零原因饒岸與浙岸毗連浙私易於充斥故特減輕科則俾得敵私疏引是饒岸乃省岸之藩籬溯查嘉慶十九年以前饒岸歷年均有溢銷嘉慶二十年以後漸形短絀然道光七年以前所缺不過數百引或數十引自道光七年以後年甚一年至去歲竟至短銷一萬六千四百八十九引之多查己丑庚寅辛卯三綱共派運六萬六千引己丑一綱二萬二千引全融省岸代銷庚寅一綱又奏明停運續於辛卯等綱代運九百二十五引到饒辛卯一

綱又經稟請融銷一萬二千引仍有辛卯未融一萬引
僅運到二千五百十六引是己丑庚寅辛卯三綱實止
行運三千四百餘引且於上年秋間稟請將存積未銷
安鹽撥運十萬包至省代銷而該岸尙有未銷殘引不
少若如此疲困固由文武緝私不力實亦岸商經理不
善復查饒州岸商黃灤泰專岸科則已減一萬八千餘
兩每年省岸攤費又不下萬金原爲緝私公用以固省
岸藩籬今則頻年缺銷而浙私直侵省岸坐糜公費遇
事推諉是饒郡徒有專岸之名並無專岸之實竊以饒
郡富庶非不可整理之岸轉爲專商所誤殊爲可惜應

請將饒岸額引改攤通岸綱店有力之家一體帶運無
須專商等情經鹽政陶澍奏奉

旨准其援照成案將饒岸額引改攤通岸綱店有力之家一體
帶運嗣據運司詳請將饒岸額引派令西省有店之尉躋美
王履泰程德泰莊德大黃正泰張介福包祥順和祥興
八商均攤認運並接開公店售賣其應徵納課銀仍照
饒岸本則報完俾與專岸相符經鹽政陶澍批准分別
咨行

道光十二年十一月兩江總督陶澍奏淮南食鹽各岸每
綱額引素稱滯銷其間南國上江額引最多尤爲壅積

向非融銷綱地卽減折運行厯經辦有成案上年辛卯開綱時已運在途及存倉未售各殘鹽積壓甚多加以夏秋大水各岸被災民間用鹽較少愈加壅滯本年辛卯綱奏銷後雖據各商將正項錢糧陸續完納收竣而前鹽未銷後鹽卽難重捆必須另籌疏通之法以免積壓又壬辰綱鹽科則前因帶徵閏月利銀及酌帶倉穀等欵較之上綱辛卯業已加重亦須量予調劑以輕成本而利轉輸見在湖廣口岸銷數正旺應卽循照厯次成案將壬辰綱甯國等食鹽二十三萬餘引全行融楚責令請辦壬辰綱商各按正帶融銷食引仍照見綱科

則均勻攤納每引應完二兩八錢三分三釐零與額定
庫欵無缺且楚西各商運食銷綱免完陞課更可將壬
辰科則扯輕得與上綱相等辦運自可踴躍實爲一舉
兩便至漢岸見據湖北鹽道詳截至本年閏九月止存
岸未售及開行在途鹽統計祇十餘萬引亟須接濟是
湖廣此時可受融銷毋虞占礙理合附片陳明奉

硃批覽欽此又運司俞德淵詳查壬辰甯國各食岸鹽二十三
萬三十三引業經詳奉奏明融入綱岸代銷照各岸壬
辰科則共應完正雜錢糧及加帶己庚正課該銀六十
五萬一千餘兩均勻攤派並定以請辦綱鹽之遲早派

給融食之多寡先後詳明批准在案今查各食岸原納科則本有輕重不一旣一律均勻攤納應將各食岸應徵正雜等款仍分請呈加三次另行改派科則諭飭各商遵照完納外理合備具清冊呈送經鹽政陶澍批允

互見統銷

道光十二年十二月運司俞德淵詳饒州岸引前經詳明併歸西岸公運錢糧統照楚西綱岸完納按饒州科則計有多餘銀兩存爲緝私等項之用所有前刊壬辰科則原照饒州錢糧專列一欵刊徵見應刪除歸併楚西吉安江甘融楚一同照完經鹽政陶澍批允

道光十四年五月運司俞德淵詳安慶岸鹽銷市疲滯急
切難以疏通以至見在存岸之鹽尙有二萬餘引壬辰
未運者亦不下四萬引如將癸巳綱鹽照前運行必致
愈積愈多更難疏通應請將該岸癸巳新鹽五萬一千
九引撥攤楚西各岸隨帶融銷卽照安慶科則完納錢
糧旣疏安慶藉以鼓勵楚西誠爲一舉兩便鹽政陶澍
批駁又據司詳籤留各商認行安慶引鹽本在辛卯開
綱一年之後前商未運未銷引鹽較多又值岸銷疲滯
以致辛壬積壓六萬餘引尙非該商等坐誤若再飭將
癸巳照舊運行瞬屆甲午開綱斷難運銷全竣經鹽政

陶澍批准如前詳融撥楚西各岸計報楚西一千引帶
運安慶二百引其科則仍照安慶完納以資鼓勵限年
內將正項錢糧一律完清不准帶欠一面陸續運行勿
誤

道光十七年八月署運司姚瑩詳據商人黃正泰稟安慶
額行五萬一千餘引自道光十二年籤商認運節因銷
滯以致甲午綱尙有三萬八千九百餘引未運丙申綱
尙有四萬三千九百餘引未運丁酉綱引則全未請運
此外更有壬辰綱許尉二商已納未運之殘鹽一萬引
計除丁酉新綱已積至九萬二千九百引若再加以丁

酉綱引則有十四萬三千九百餘引之多即使口岸暢銷亦勢難疏通應請以丁酉合綱之引融綱等情護司查楚岸已運未銷及未運各綱爲數甚鉅且尙有壬辰食鹽及癸巳甲午安慶池州融楚未運之引斷難再准融楚經鹽政陶澍批允許尉二商懸引另辦官運

道光十七年十月鹽政陶澍奏淮北改行票鹽奏銷有盈無絀淮南則商人力能辦運者僅有數家內許宏遠尉躋美二商去冬因疲乏倒歇招商認運半載以來莫肯承充計距來年奏銷不及五箇月必須早爲籌畫方可趕副額課請於丁酉綱淮南引內提出二十萬引連帶

乙未一分二萬引融運淮北行銷卽將所完之稅撥補淮南許尉二商空懸之課懸引有著各商卽可騰出貲本起辦課運以副來年二月奏銷期限至南北每引正課大畧相同惟淮南雜項名欵爲數甚多此項融撥二十二萬引除將票稅經費等項儘數抵收淮南課銀外尙有不敷仍於淮南本岸分別扣攤並不爲重等語奉硃批戶部議奏欽此嗣戶部議兩淮引課南北各有定額今以乏商懸引請將淮南引目提出二十二萬道融銷淮北並將撥抵不敷之欵加派淮南是淮北幾增一倍之鹽淮南又攤無鹽之課統計熟籌原非正辦惟見在暢滯

情形南北互異自不得不權宜辦理庶免此盈彼絀之
虞既經該督將淮北融銷並無窒礙淮南攤銀亦不爲
重縷晰敷陳並據查明南北抵運一轉移間則懸引有
著可副來年二月奏銷限期核其所請係爲趕副額課
趙辦奏銷起見應准其將淮南引內提出二十二萬道
融運淮北行銷但查前項融引按淮南科則核算共應
徵正雜銀八十七萬餘兩今融銷淮北應照淮北科則
納課計應徵票稅經費銀三十一萬餘兩除將此項課
銀抵撥外尙有不敷銀五十六萬餘兩亦應如所請仍
行攤人淮南按引交納相應請

旨敕下該督核實經理嚴飭運司等迅卽妥辦乘此數月之久
不分南北一律起銷務將淮北抵撥銀三十一萬餘兩
並淮南攤派銀五十六萬餘兩於來年二月奏銷以前
埽數全完分別造報倘融運以後復有滯銷以及應抵
應攤各項稍形蒂欠或因南課旣融於北遂牽入淮北
奏銷並以淮南攤課係屬增加卽思藉詞延緩致令引
官課懸有誤奏限除將該商等嚴行懲辦外並請將該
督等照例參處以杜弊混而肅鹹綱奉

旨依議欽此

道光十八年十一月鹽政陶澍奏戊戌綱淮南引課自本

年四月開綱經臣督飭運司按照上綱商請引數派令
完納請運並將上年奏明之許宏遠尉躋美二商倒歛
懸引二十餘萬設法另招新商認辦無如綱食各岸遞
年銷不足額以致殘引愈積愈多商力不能轉輸新綱
益形喫重人皆畏累莫肯承充至今僅籤新商鮑良輔
鮑中輔二人所認懸引不過二萬空缺尙多統計存岸
未售並開行在途及已未完納新殘各引不下兩綱有
餘本非數月內所能運銷完竣臣與署運司沈拱辰按
限催徵不遺餘力各該新舊商人尙知激發天良將原
派認運引數隨時勉力輸將可期趕副造報惟許尉二

商退懸引內扣除新商接認尙有二十萬引一時既難足數見商又無力兼顧若不及早另籌深恐難敷課額請援照上年融北之案於戊戌綱淮南綱食引內提出二十萬引連帶乙未一分二萬引融運淮北行銷卽將民販所完稅銀撥補淮南許尉二商空懸之課如此量爲轉移則淮南懸引均成有著淮北各岸無虞缺銷至提出淮南二十萬引按照綱食科則輕重核算共該入奏正雜課銀二十九萬八千餘兩外帶雜欵三十餘萬兩以淮北每引所定票稅經費撥補淮南每引應完入奏正雜課銀有盈無絀其外帶各雜欵上綱係加攤淮

南引內徵完本年有奏准淮北協貼淮南銀三十六萬
數千餘兩以此抵補見融南引外帶雜欵卽毋庸再於
淮南引內攤徵科則並未加增南運尤爲利益第上年
票鹽溢請止二十一萬七千四百五十七引零今請受
融南引連帶乙未一分係二十二萬正數仍不敷二千
五百四十二引零應於本年票鹽溢請引內撥足下餘
溢請引課仍爲協貼淮南之用再此次融引攤派湖廣
岸六萬引江西岸四萬引安慶岸二萬五千引池州岸
一萬引太平岸五千引甯國岸三萬引上元江甯二岸
二萬引和州含山江浦六合句容溧水高淳全椒八岸

一萬引合併聲明奉

硃批戶部議奏欽此經戶部以該處縣商並未認真招募駁令
招商承運設法疏銷覆奏奉

旨依議欽此嗣經鹽政陶澍覆奏兩淮鹽法例准融銷嘉慶年
間淮北己未庚申壬戌等綱引鹽均經奏准融運淮南
卽鹽法志書內載淮北壅引曾有改於淮南行銷之例
可見南北融銷並非始自今日遵例而行似不得謂非
正辦仍請將戊戌綱淮南懸引二十二萬引融運淮北

奉

硃批戶部再行核議具奏欽此嗣戶部覆奏引目各有定界卽

遇商懸岸滯撥歸暢地行銷亦屬權宜辦理檢查兩淮
鹽法志內稱融銷之案部臣多援例議駁可見引目融
銷並非定例自不得謂之正辦上年該督奏請融運臣
部卽照例議駁今該督復稱融銷係遵例而行實屬藉
詞支飾惟淮南疲敝情形見據該督剴切籲陳况奏銷
業已屆期即使另行籌畫亦屬緩不濟急若不予以變
通轉恐竭歷周章有所藉口臣等公同商酌姑准其量
爲轉移卽將戊戌綱懸引提出二十二萬道融於淮北
行銷所有懸引課銀按數抵補足額嗣後不准援以爲
例奉

上諭如所議行欽此

恭載

上諭一道
制詔門

道光二十年十一月運司沈拱辰詳淮南綱食各岸虛懸
引額不下二十餘萬引因節次招練無商承運是以每
綱奏銷僅止籌完八分一釐其無著懸引俱歸入未完
一分九釐數內俟至下綱補報時酌加調劑分派見運
商人完課請運俱有案卷可稽今己庚兩綱懸引尙無
著落若全數加派見運商人必致更形喫重請將庚子
正綱及己亥殘綱內虛懸引目酌提出二十萬引綱食
配搭共應完奏課三十一萬餘兩由海分司出示曉諭
票販完納綱食奏課派給票鹽免其驗貨勒限半年找

納雜項請運如逾限不請卽給南商運行等情經鹽政
裕謙批淮南庚子奏課楚南各商早有派運引數本應
按數追完便已足敷造報惟據稱虛懸引目二十餘萬
自未便終歸無著見在淮北票販獲利較多應如詳飭
令海分司出示票販招徠認納俾得趕辦奏銷至安池
太及各食岸引鹽三十二萬四千五百餘引與永順等
鹽同屬專商認運之引非如楚西可比當於各商名下
追究若如該司所詳以二十萬引之懸課分別綱食搭
配必致各商觀望食課全虧所請礙難遽准須俟催有
成數再行酌核辦理

道光二十年海州分司童濂稟淮北票販厯係專辦北鹽
於淮南情形不熟未知認辦懸引有利與否卽有熟習
淮南鹽務票販亦恐完納一次之後卽奉籤作南商不
能如淮北票販之來去自由而其認辦之引又未奉明
定口岸查淮南綱食各岸暢滯不一科則亦多寡不同
如安池太等處食鹽及江西口岸費重銷滯南商尙不
請運票販何能認辦是以見在販情不無觀望合無仰
懇憲臺將淮南偶因引目虛懸是以招徠認辦仍照票
鹽章程去來聽其自便將來並不籤作南商下年亦不
援以爲例緣由俯賜批示以便卑職出示曉諭俾票販

不致視爲畏途其懸引二十萬並請於湖廣口岸己庚
兩綱懸引內撥出凡食鹽及江西等岸概不派給以免
票販成本虧折至於認引之能否獲利難以深知如因
有利可圖專責票販殷實之戶認辦固屬意存偏袒或
因無利可圖專責票販殷實之戶認辦亦屬事有偏枯
且見在認引與報效同時並行不能於票販之中分別
孰爲認引孰爲報效並請於十二月內開局之期將淮
南楚岸懸引二十萬每引先完銀一兩五錢共銀三十
萬兩與票販自願報效銀三十萬兩一併均攤於票鹽
正額四十六萬引按數徵解該票販等同在場下彼此

相熟雖均攤引數畇零不難彙成總數歸併辦理則派分一律公平而票販亦屬眾擎易舉其完納懸引課銀俟按引徵收齊全之後令該票販等各具手本填明認運銀引數目由卑職於手本內蓋用印信付給執照以憑前赴運司衙門呈繳我納雜欵錢糧請運並由卑職造具販名銀引數目清冊通齊備查經鹽政裕謙批據稟請將票販認納懸引仍照票鹽章程去來聽其自便將來並不籤作南商下年亦不援以爲例自應准行至懸引二十萬據請於湖廣口岸已庚兩綱懸引內撥出凡食鹽及江西等岸懸引概不派給固與本署部堂批

駁不准綱食配搭之意相符惟懸引內本有江西之數
今若並江西而不撥將來江西懸引歸何去路是江西
懸引亦應酌撥又見招票販所認懸引據稱無論有利
無利均難責令殷實票販專認所論甚是自應如稟於
本年十二月開局之期將淮南楚西懸引二十萬每引
先完一兩五錢其銀三十萬兩與票販願報效銀三十
萬兩一併均攤於票鹽正額四十六萬引之內按數徵
解俾得攤認公正以免偏袒

道光二十一年海州分司童濂稟各票販已將認辦淮南
懸引奏課銀三十萬兩全數交納在庫查楚西引鹽每

引成本約十兩零到岸約可售價十四五兩本輕利重
票販豈不樂成且奏課銀兩既已完納何肯甘心棄鄰
惟人情難於謀始今當章程未定不免逡巡畏縮推原
其故一因從未赴南場買鹽價值斤重皆所未諳一因
憲臺衙門體統尊嚴票販找納錢糧無從進一步一因前
赴楚西賣鹽慮爲岸商水販人等把持是以懷疑觀望
而錢糧旣已完納成本所關實有礙於大局卑職再四
籌思如蒙憲臺俯順販情量予變通俾令得歸簡易則
人心無不踴躍茲票販認運懸引之鹽如實於淮南情
形不熟不能赴南場買鹽且不能赴憲臺衙門投稅者

應請卽在海州分司衙門照楚西配搭之例每一票販
名下按其請運引數分爲楚鹽七成西鹽三成均照淮
南科則除已完奏課銀每引一兩五錢零再將雜課錢
糧七錢零同緩納之一兩七錢零一併全數找納准其
在淮北買鹽每引四百斤出場由海州分司報名發給
護照運至王營堆儲照淮北江運之例不復改摺仍以
五包併爲大引以省水腳雜費迨由王營搬過黃河至
見在江運請掣之鐵心壩地方聽其自雇江船以北監
掣同知作爲泰壩委員逐包稱掣上船該廳稟報憲臺
將引目施水等件發交淮南監掣同知衙門俟鹽船行

至揚州三汊河地方由淮南監掣同知復行稱掣一次不必前赴儀徵改捆子包將引目等件發給收執並將海分司所給護照呈繳南監掣衙門移回查銷該鹽船由瓜州口出江前赴楚西口岸銷售其鹽到岸之後聽其隨到隨賣不必封輸挨賣俾得往返順速以期保固成本並照初行票鹽之例以淮北委員爲之督率倡導使其在途在岸不致留難阻窒似此一轉移間則淮北捆運納稅皆係票販熟習兼有委員督運則岸商水販亦不能有所把持至於勒限半年一節查票販上稅之後卽須料理淮北捆運事宜直至開閘運鹽到壩方能

顧及淮南懸引其時已在半年限期之後實係趕辦不及應請以來年畫清錢糧由卑職發給印本之日爲始於原定半年限期之外展限半年統予一年限期俾票販得以從容籌辦如有逾限不請卽將所給印本註銷作爲廢紙不准再行找課請運則限期寬展其所完奏課不致輕於棄擲儻試行一次獲利票販歡欣鼓舞無不頂戴憲恩其完納淮南懸課准令捆運北鹽將來開出此路則淮南之協貼每歲加增而淮北多銷一引之鹽卽少透一引之私亦可無慮溢產比之改行票鹽尤爲功被兩淮南北兼利雖此時試行之初未必能全數

請運但止運銷數萬引以爲將來之倡導亦於大局有
益況此二十萬無商認運之鹽係在南綱正額數內並
非格外添出有礙南綱銷數卽捆運並非限定北鹽亦
不致占礙淮南場商賣鹽地步而錢糧係照淮南科則
更非以淮北輕課侵沖淮南重課卑職爲南北大局起
見非止爲淮北票販保固成本如奉允准伏祈詳請督
鹽憲奏明飭知照辦經鹽運使沈拱辰批查引地各有
疆界南北難容混淆道光十五年間淮南雖有借運北
鹽之案亦止江西官運北鹽二萬引係因南鹽歉產西
岸缺售萬不得已而爲之並非正辦其時北鹽尙未到

岸南鹽卽陸續運到以致北鹽未能銷完派令南商繳價領買隨時搭銷各商深受其累見在楚西兩岸存鹽壅積正處無法疏通兼之淮北自改行票鹽以來淮南各岸屢以票私侵灌藉口銷滯然南北鹽色迥別猶易稽查遇有票私侵入淮南引地即可嚴行查拏是以票鹽亦不敢公然侵越况票販認納淮南懸引錢糧卽行派給票鹽免其驗資名爲幫助淮南實係調劑票販此中獲利已多今若令其我納雜課仍運北鹽以五包併爲大引徑達楚西兩岸聽其隨到隨賣直以淮北票鹽行運淮南毋論南場鹽價較北鹽每引貴至五六倍其

中屯駿有費捆掣有費到岸進店有費成本輕重懸殊
斷難與北鹽一律並售勢必北鹽任意搶跌南鹽顆粒
難銷而且南北毫無區別官私莫辨必致票私乘機侵
占無從稽查淮南大局卽成渙散每綱四五百萬課銀
盡歸無著目前庚子奏銷尤虞貽誤是北鹽運南徒爲
票販利益加利而於淮南獨受其害有萬萬不能准行
者且票販認納淮南縣引前經詳明勒限半年找納雜
項請運如逾限不請應將完過正項之引派給南商如
票販不甘棄擲自願請辦所有南鹽價值皆有大市捆
運斤重久有定額至於本公司衙門收納商課每年不下

四五百萬從無難以上兌之事何致無從進步口岸售
鹽係按月公同議價水販亦無從把持皆無所用其畏
縮所稟票販懷疑各層尤爲慮非所慮惟據稱票販上
兌之後卽須料理淮北捆運事宜半年限期趕辦不及
尙屬實情仰候詳明督鹽憲展至二十一年底止勒令
各票販將完過正項懸引按照楚西科則我納雜稅前
赴南場重運一應捆掣事宜悉照南商辦理如逾限不
請仍照前詳派給南商運行俾南北引界肅清免致票
私乘機充賺併以保全淮南大局兼顧庚子奏銷
謹按以上均係融銷成案

雍正七年五月巡鹽御史噶爾泰奏兩淮引鹽歷係壓綱
運行今請將己酉綱提上一年卽於本年十月內開徵
其戊申一綱內除河餉五萬兩係按季節省捐輸之項
各場課銀共七萬七千八百十四兩八錢六分四釐零
應隨綱徵輸外共計行鹽一百六十萬一千八十一引
應完正課銀一百九十五萬九千五百九十二兩五錢
五分九釐零分作十年帶銷從己酉綱起至戊午綱止
每年帶銷鹽十六萬一百八引帶徵正課銀十九萬五
千九百五十九兩二錢五分五釐零以符年運年銷戶

部覆准

乾隆八年八月鹽政準奏江廣地方民物殷庶近年鹽
引暢銷自庚申綱以前歷年皆有套壓新舊並運是以
銷引不致告絀臣於乾隆五年任事所有歷綱殘引已
設法疏銷全完今見運乾隆八年癸亥綱引遇有閏月
查淮南綱引惟饒州吉安二府係專商行運其餘皆係
按月分派引數運至各總口岸行銷今以十三箇月派
算核之近日暢銷情形額引不敷民食必須預備接濟
但遇閏多銷鹽斤非歲歲可加之數未便遽請增引查
有乙卯一綱引鹽仰蒙

聖恩俯准每綱帶行一分作十年帶完自庚申綱起計至己巳

綱告竣今見在帶行期內應請卽將乙巳綱帶乙一分
綱引除饒州吉安引目見敷民食毋庸預請外其該綱
淮南應帶綱引十萬五千五百三十五道預請頒發於
癸亥綱內附帶辦運則十綱帶行之鹽作九綱帶完於
正課民食均有裨益部議查癸丑甲寅兩綱引鹽壅積
於雍正十三年欽奉

諭旨將乙卯綱未完正額提出分年帶徵其帶徵之處俟見在
各項帶徵完納之後分年起限乙卯綱內應帶運口岸
之鹽免其帶運續於乾隆四年據前任鹽政三保以帶
戊引鹽完竣奏請自庚申綱起將乙卯綱引鹽照帶戊

之例分作十年帶銷在案今癸亥綱額引既不敷民食
應如所請將己巳綱應帶乙卯綱引內除吉安饒州仍
歸己巳綱帶銷外其淮南應帶一分提入癸亥綱內帶
辦再查乾隆九年臣部議覆前任刑部郎中樊天游條
奏淮南增引案內行令照各省請領餘引之例查議具
題嗣據前任鹽政三保以帶戊一分完竣乙卯綱引卽
應接續領銷萬無缺少之處部議頒發餘引俟十年帶
完之後如果行銷疏暢再爲酌核具題覆奏在案今癸
亥一綱旣因添銷閏月鹽斤預提己巳帶乙綱引則銷
鹽已屬疏暢嗣後遇閏之年應否照例預提帶乙綱引

辦運並乙卯鹽引各綱帶銷完日作何增引行銷之處
應令該鹽政會同兩江總督酌籌另議旋於九年四月
鹽政準奏等題覆嗣後遇閏之年應請先儘該綱正帶
額引行銷查核追綱並無不敷卽照定額派運毋庸另
議儻果有不敷仍請預提帶乙綱引接濟至乙卯引鹽
帶銷完日有無不敷銷售應否另籌增引應俟臨期查
核酌辦戶部議覆嗣後遇閏之年如屬暢銷則照例預
提帶乙綱引以資接濟儻殘引積壓遇閏僅堪勻銷額
引卽將不能預提緣由奏報其乙卯鹽引帶完之後應
行酌增引目及作何運銷之處自應先期核議以便辦

運若必俟帶銷完日臨期酌議辦理必致各處民食不
敷接濟應令該鹽政務於乙卯鹽引將完之二二年前
預行查明妥議具題奉

旨著照該鹽政等所請行欽此

乾隆九年十月署鹽政吉慶奏上年癸亥綱因遇有閏月
陞任鹽政準奏恐額引不敷民食請頒淮南己巳綱帶
乙綱引於癸亥綱內附帶辦運完額今甲子綱雖未遇
閏而口岸暢銷情形與癸亥綱有閏無異誠恐額引不
敷應請預提戊辰綱帶乙一分綱引內除饒州吉安二
府引鹽足敷民食毋庸預籌外應帶行綱引十萬五千

五百三十四道預請頒儲運庫以備各商陸續上課配
運卽並入甲子綱內附帶奏銷儘此後月分或行銷稍
滯未能足額仍懇

恩准臣細按情形隨時酌辦儘銷儘報戶部覆准應如所奏照
數頒發至所稱此後月分或行銷稍滯未能足額請隨
時酌辦儘銷儘報之處查此項原係額外增銷非本綱
正額可比應令該署鹽政等轉飭上緊辦運如有餘曆
准於下綱帶銷

乾隆十年六月署鹽政吉慶奏乙丑綱正帶引鹽見在陸
續督運行銷按江廣口岸目前銷售情形實覺疏暢恐

將來民食或有未敷請將丁卯綱淮南帶行乙卯一分綱引內除饒州吉安二府毋庸預請外應帶綱引十萬五千五百三十四道預請頒儲運庫以備各商輸課領運戶部覆准應如所奏照數頒發再查兩淮乙卯綱引先據前任鹽政三保奏准自庚申綱帶銷起至今歲乙丑綱已帶銷過六綱引目又陸續預提己巳戊辰丁卯三綱計共帶完九綱止有明年丙寅一綱未經帶運其丙寅綱帶完之後並無淮南帶乙引鹽每年各處銷售卽少此一分引鹽自當先期酌增以資接濟應令該署鹽政吉慶等將如何酌增引目之處先期核議具題以

便辦運隨於次年閏三月吉慶奏議數定額恐日後滯銷貽累請將甲戌綱淮南北歲額綱鹽一百四十一萬五千三百九十四引預提存部專備淮南暢銷之江廣口岸接濟民食其每年可銷若干引容臣相時酌處定期約數咨部請領如不敷銷售量爲增領有餘仍繕運庫爲下綱應用統於該年奏銷冊內登明俟_道_司_州_縣開完竣之後另行酌議奏請如淮南別處口岸帶乙設後或民食亦有應行接濟之處並請於前項預提引內報

部接濟儻蒙

諭允請卽自本年丙寅綱爲始本年適逢閏月帶乙運銷之後

約以二十萬引作數有餘不足仍容隨時酌辦再淮北
試行加帶餘鹽請作定額案內聲明帶乙引內加帶餘
鹽引二千七道俟帶乙運竣應請停給部議行令臣於
淮南帶乙綱鹽完竣案內一併核議今查淮北帶乙引
目並未預提須帶至已巳綱始竣請俟帶乙竣後再加
帶餘引二千七道應否停給之處再行酌議奏請經大
學士會同戶部覆准

乾隆十三年九月署鹽政吉慶奏淮南綱鹽正額而外前
因帶乙引目將完當經臣奏蒙

恩准預提甲戌綱淮南淮北歲額綱鹽一百四十一萬五千三

百九十四引專備淮南暢銷接濟今丙寅丁卯二綱已
領銷過五千萬引本年戊辰綱因有閏月經臣約數請
領四十萬引而淮北帶乙將竣見年所領之引均已全
給各商領運行銷是提甲引目僅存五十一萬有零除
歲底再行約數請領外卽所賸無幾相應仍懇

聖恩照例預提引目不爲限制總期民食有濟課運源源惟是
臣前請預提甲戌不過指綱以爲帶運若行至甲戌年
分則甲戌正綱鹽引自應照常領運而一切皮票梔水
等類綱名無不重複莫若不指綱名尤爲妥協今請將
兩淮綱引提出一百萬道卽名預提備濟民食引每年

可銷若干仍容相時酌度先期約數咨部請領有餘不足並一切徵課奏銷仍照提甲帶乙之例辦理戶部議覆前將甲戌一綱預提其不另立引名者原以兩淮有一定歲額不便遽爾加增而百姓有淡食之虞更須先事籌畫然另提引名預定數目又恐綱名混淆難以稽核臣等酌議兩淮行鹽引目嗣後歲額不敷令該鹽政先期約數奏請卽於次年額引內提出行銷至次年正綱仍照歲額請領或再不敷亦於下綱約數預提其預提之引臣部於引內註明預提字樣一切皮票梶封等類俱照樣註明以免正綱重複設所提之引不足銷售

量爲增領如有餘贋繳部查銷統於奏銷冊內聲明具題其徵課奏銷悉照帶乙提甲之例辦理

乾隆十五年二月署鹽政吉慶奏兩淮綱鹽額引而外經臣於乾隆十一年奏准預提甲戌綱鹽引一百四十一萬五千三百九十四道嗣因每年提銷所贋無幾又於乾隆十三年照例奏請預提備濟經部議令歲額不敷先期約數奏請於次年額引內提出行銷引內註明預提字樣不足請增餘贋繳部在案今查預提甲戌引目自丙寅丁卯戊辰己巳四綱已提銷過一百二十萬引僅贋二十一萬五千三百九十四引就見在暢銷情形

庚午雖無閏月歲額之外尙須預爲備濟所存提甲引
目恐不敷銷售臣相時約數除將所贅提甲引目全領
外應請再將次年額引預提二十萬道共成四十一萬
五千三百九十四引以備接濟民食奉

旨知道了欽此

乾隆十五年二月戶部議覆署鹽政吉慶奏兩淮食鹽口
岸帶乙引鹽已經完竣請將暢銷食鹽口岸亦照綱鹽
例預提引目不爲限制應如所請自庚午綱爲始每年
可銷若干令該署鹽政先期約數咨部卽於次年額引
內提出行銷至次年正綱仍將歲額請領其預提引目

臣部於引內註明預提字樣設所提之引不足銷售量
爲增領如有餘賸繳部查銷統於奏銷冊內聲明具題
奉

旨依議欽此旋經運司郭一裕詳請將淮南暢銷之甯國和州
含山江浦全椒五食岸照帶乙之數各照額提行一分
共預提一萬二千八百七引經鹽政咨部照數請領

乾隆十六年二月署鹽政吉慶以辛未綱係有閏之年見

在口岸暢銷奏准預提次年引目四十萬道以備接濟
復於閏月以辛未綱甯國和州含山江浦全椒該五食
岸正提各引俱暢銷無滯按照提辛一分之數咨部預

提下綱引目一萬二千八百七引

乾隆十七年三月鹽政普福奏准預提癸酉綱引三十萬道又咨部預提癸酉綱甯國和州含山江浦全椒五岸食引一萬二千八百七道又於十八年奏准預提甲戌綱引目二十萬道

乾隆十九年二月鹽政吉慶奏准預提乙亥綱引三十萬道並甯國等五處食引一萬二千八百七道二十年二月又奏預提丙子綱引三十萬道以資接濟

乾隆二十一年閏九月鹽政普福奏准預提丁丑綱引目三十萬道給商領運

乾隆二十四年二月鹽政高恆奏准淮北積引趕運已完
己卯額引不敷配運預提庚辰綱引十萬道又於二十
五年正月奏准兩淮己卯綱瞬屆奏銷卽應開運庚辰
引目察核各口岸情形應預提辛巳綱引三十萬道

乾隆二十六年四月大學士公傅恆等條奏兩淮應銷額
引一百六十八萬五千四百九十二道從前除行銷額
引外尙有帶銷引目並引課折價等項未完自乾隆九
年吉慶到任後將應銷額引並未完引課全數通完從
此積引旣銷額引不敷民食吉慶自乾隆十一年丙寅
綱起始逐年奏請增銷餘引自二十萬道至三十萬四

十餘萬道不等普福前後兩任請銷過餘引二次計五十萬道高恆任內請銷過餘引一次計四十萬道後因官鹽不能暢銷以致引目壅滯經高恆將乾隆二十三

年戊寅綱額引鹽課懇

恩分作十年帶銷在案查行銷餘引原以接濟民食而商人多銷一引卽多沾一引之利是以初增餘引俱係均攤通河眾商見在所提餘引祇給辦差數商行銷固亦鼓舞急公之意但商人凡遇一切報效捐輸皆係通綱眾商按引輸納應令嗣後將所領餘引均攤通綱各商一例行銷旋經鹽政高恆具奏商人中有並不運鹽納課惟

挂虛名者更有二等以賤價收固引窩視口岸暢銷運
商爭買窩價騰長該商等無經營之勞而博倍蓰之利
一遇滯銷窩價稍賤則居奇擡價運商欲出價購買誠
恐不能暢銷以致觀望所以運司每至年終有催徵督
運之難誤國病商莫此爲甚上年楊重英護理運司印
務曾查出淮北商人章文和囤積引窩詳明嚴究治罪
追出固窩散給運鹽各商在案似此罔利之徒均在通
河之列若將餘引一例派與是以安坐博利之外又復
徒手得窩請嗣後如遇引鹽暢銷奏請提引自應遵照
原議攤派惟飭運司查核各商本綱納過請單呈綱錢

糧若干引卽以定派給餘引之數行鹽納課多者多給少者少給其無鹽可運自無課可納皆係虛挂引名之商均不得入派給之例奉

硃批如所議行欽此

乾隆二十九年五月鹽政高恆奏准預提乙酉綱淮南綱引三十萬道淮北綱引十萬道又於三十年四月奏准淮南江廣口岸銷售暢旺乙酉綱額引不敷預提丙戌綱引二十萬道

乾隆三十一年八月鹽政普福奏准口岸暢銷丙戌綱引不敷民食預提丁亥綱淮南綱引二十萬道淮北綱引

五萬道分給以資接濟又於三十二年九月預提戊子
綱淮南綱引二十萬道淮北綱引五萬道

乾隆三十三年九月大學士公傅恆等議覆江蘇巡撫彰
寶等奏辦提引一摺據稱兩淮預提綱食鹽引自乾隆
十七年起至三十二年共預提淮南淮北四百九十六
萬六千六百二十二道內除食鹽五萬一千二百二十一
八引口岸甚疲非綱引暢銷可比及淮北綱鹽四十九
萬二十萬向無餘利均不計算外惟淮南所提綱引共
四百四十二萬五千三百七十四道歷年引價高低不
一每引值銀自二兩遞加至三兩不等按年核算商人

除完納正項錢糧外共存餘利銀一千九十二萬三千八百九十七兩六錢俱係例應歸公之正項乃歷年各鹽政從未議請歸公始則散給商人領運聽其漁利自肥繼則選擇總商分賞以作獎勵示惠該商等或代購器物結納餽送或藉稱差務浪費浮銷種種情弊不可枚舉所有查出各款銀兩自應儘數追繳以清

國帑查歷年提引應行歸公銀一千九十二萬二千八百九十七兩六錢此內除奉

旨撥解江甯協濟差案及解交內務府抵換金銀牌課與一切奏明動用並因公支取例得開銷銀四十六萬一千七

百六十九兩九錢二分五釐又見儲在庫歸欵銀二十一萬二百六十五兩六錢三分六釐二共銀七十二萬二千三十五兩五錢六分一釐免其追繳外所有各商節年領引未完納銀六百二十五萬三千五百八十四兩一錢六分六釐又總商藉稱辛力膏火銀七十萬三千六百二兩又楚商濫支膏火銀二千兩又總商代鹽政等購辦器物浮開銀十六萬六百八十七兩零又各商藉差動用銀一百四十八萬二千六百九十八兩八錢並辦差浮開銀六十六萬七千九百七十六兩八錢以上商人名下共應繳完銀九百二十七萬五百四十

八兩七錢七分九釐其各商代吉慶高恆普福購辦器
物作價銀五十七萬六千七百九十二兩八錢二分一
釐又各商交付高恆家人張文學及顧蓼懷等經收各
項銀二十萬七千八百八十七兩八錢五分六釐又各
商代高恆辦做檀梨器物銀八萬六千五百四十兩一
錢四分四釐應如該撫等所請高恆普福名下無可追
抵之項均著落總商名下賠完通共核計應追繳銀一
千一十四萬一千七百六十九兩六錢至普福向運庫
支用並無檔冊可稽之丁亥綱銀四萬二千八百五十
一兩四錢三分九釐若普福不能追抵亦應如所奏在

於通河眾商名下均攤賠補其盧見曾婪得商人代辦
古玩銀一萬六千二百四十一兩例應於盧見曾家屬
名下勒限追繳如不能全完亦應在眾商名下著落分
賠至該撫等所稱眾商情願於本年戊子綱一年限內
先繳銀一百二十七萬五百四十八兩七錢七分九釐
其餘八百萬兩應如所請自明年爲始每年完銀一百
萬兩分作八年全完至代鹽政購辦器物及交付張文
學顧蓼懷並辦做檀梨器物又普福自支取丁亥綱銀
及代盧見曾辦古玩銀兩俟伊等本身應交銀兩全完
後所有各項應請交與該鹽政運使等分年按數催繳

每年如數交庫後仍令該鹽政附摺奏

聞儻逾限不完除將該商從重治罪鹽政運使卽照承追不力例議處嗣於乾隆三十五三十六四十五等年節次

欽奉

上諭展限又於四十七四十九年兩次欽奉

恩旨豁免三百六十三萬二千七百七十四兩有奇

互見
恤商

乾隆三十三年九月戶部覆准鹽政尤拔世奏預提己丑

綱淮南引目二十萬道派給通河各商領運於次年開綱時奏明按照窩價計算每年應繳餘息二兩六錢共

應繳銀五十二萬兩

乾隆三十六年八月戶部覆准鹽政李質穎等奏預提淮南壬辰綱引二十萬道派給通河各商領運接濟於次年開綱時奏明每引應繳餘息二兩八錢共應繳銀五十六萬兩

乾隆三十九年七月鹽政李質穎等奏准預提淮南乙未綱引二十萬道公派通綱以資民食於次年開綱時奏銷每引應繳餘息銀三兩共應繳銀六十萬兩

乾隆四十年七月鹽政伊齡阿等奏准預提淮南丙申綱引二十萬道給商運濟例繳餘息每引應繳銀三兩共應繳銀六十萬兩

乾隆四十二年八月戶部覆准鹽政寅著等奏預提淮南
戊戌綱引二十萬道公派通河眾商領運例繳餘息每
引應完銀三兩共應繳銀六十萬兩

乾隆四十四年十月戶部覆准兩淮鹽政伊齡阿奏預提
淮南庚子綱引二十萬道分給通河以資接濟例繳餘
息每引應完銀三兩共應繳銀六十萬兩

乾隆四十六年八月戶部覆准鹽政圖明阿等奏請預提
淮南壬寅綱引二十萬道給商接濟應繳餘利每引繳
銀三兩共應繳銀六十萬兩

乾隆五十一年十一月大學士公阿桂等議覆兩江總督

李世傑鹽政徵瑞會奏自丁未綱爲始每閒一綱預提
一次一摺查兩淮提引凡遇暢銷之年卽應通融籌辦
自四十七年以後未經奏請預提是以戶部查案奏令
該鹽政等詳察情形據實奏明今據該督等查覆商人
雖無額外夾帶私銷情弊但提引已隔四年之久係鹽
政運使辦理不善所致請自丁未綱爲始每閒一綱預
提一次少則二十萬道多則隨時酌增至應完課項請
緩至下綱完交以紓商力其前四年未經預提年分亦
請派提兩年課項分作五年補交均應如所奏辦理奉

恭載

上諭一道
制詔門

乾隆五十七年十月鹽政全德奏淮南綱鹽額引溢銷臣既奏請提引其食鹽口岸亦有溢銷之處向來俱係抵補缺銷口岸上年春間臣會同督臣孫士毅奏准缺銷之課分別官商著賠是鹽雖缺銷課已有著無庸撥抵則溢銷口岸亦應請引增銷查上年全椒含山六合溧水宣城句容江都甘泉高郵寶應十州縣共溢銷九千四百九引本年四月中臣等曾奏明應行提引在案今壬子開綱已久察看各岸銷售情形須早爲接濟應請照上年溢銷之數增給壬子綱九千四百九引給商辦

運所有增引內應繳之項查食鹽口岸爲利較薄不能
照納鹽之利核算各口岸正雜錢糧多寡不同窩價餘
息亦輕重不一其附近場竈鐵商專辦之高寶二岸只
繳正課並無雜項及窩價餘息應照各岸舊例分別繳
納每引自八錢至三兩四錢不等計九千四百九引共
應繳銀二萬七千八百餘兩卽隨王子綱奏銷起解嗣
後每年察看情形總以本年溢銷若干爲來年增引之
多寡隨時奏請辦理奉

硃批該部知道欽此

乾隆五十七年十一月戶部覆准鹽政全德等奏預提淮

南癸丑綱引二十萬道給商領運以資接濟所有錢糧及窩價餘息等項每引應繳銀四兩五錢零共銀九萬一千餘兩統入癸丑綱內分別奏銷總徵分解

嘉慶五年四月鹽政書魯等奏承准戶部札催預提辛酉綱引目以資接濟當經轉行運司飭據總商等議稟核詳查江廣口岸近年本未暢銷本年先有奏准淮北已未融南五萬併引又淮北庚申融南五萬併引計增運鹽二十萬引實已充裕據議酌請預提辛酉引目十萬道存儲運庫俟辛酉年察看口岸情形再行領辦似爲慎重額課起見所有應完提引庫項並窩價餘息每引

該銀四兩五錢零計十萬引共銀四十五萬餘兩照例
隨同辛酉正引奏銷如屆期不能運全卽令該商等先
行照數墊完以副奏限奉

旨允行

嘉慶八年十月鹽政信山奏本年江廣兩省銷鹽暢旺請
預提甲子綱引目二十萬道以資接濟其提引錢糧及
窩價餘息等項共應完銀九十萬兩陸續完繳候撥奉

旨允行

謹按以上均係提綱成案嗣後兩淮岸銷疲滯日甚
一日有銃銷而無預提至於道光初年淮南僅照原

額引目折半行運尙苦滯銷淮北歲運僅二萬餘引不及十分之一於是票法始興陶澍初行之淮北每年溢銷十六萬餘引遂以爲額迄後陸建瀛推行於淮南減浮費散輸銷至一年行兩年之引前此未有也行之未久其法已弊未及補救而寇亂作矣故預提綱引後無聞焉

兩淮鹽法志卷六十九

專里司 融消 是綱

七